

卷九 傷寒例 辟溫

發汗散 發汗湯

宜吐 宜下

卷十 傷寒雜治

勞復 附陰陽易

百合 傷寒不發 并變成狐惑

傷寒發黃 溫瘧 診溪毒證

千金要方

孫真人備急千金要方卷九

長沙張玉先生行藏

南沙張玉先生行藏

傷寒方上凡九類

傷寒例第一論三首

論曰易稱天地變化各正性命然則變化之迹無方性命之功難測故有炎涼寒燠風雨晦冥水旱妖災蟲蝗怪異四時八節種種施化不同七十二候日月運行各別終其晷度方得成年是謂歲功畢矣天地尙且如然在人安可無事故人生天地之間命有遭際時有否泰吉凶悔吝苦樂安危喜怒哀愛憎存亡憂畏關心之慮日有千條謀身之道時生萬計乃度一日是故天無一歲不寒暑人無一日不憂喜故有天行溫疫病者卽天地變化之一氣也斯蓋造化必然之理不得無之故聖人雖有補天立極之德而不能廢之雖不能廢之而能以道御之其次有賢人善於攝生能知撙節與時推移亦得保全天地有斯瘴癘暹以天地所生之物以防備之命曰知方則病無所侵矣然此病也俗人謂之橫病多不解治皆曰日滿自瘥以此致枉者天下大半凡始覺不佳卽須救療迄至於病愈湯食競進折其毒勢自然而瘥必不可令病氣自在恣意攻人拱手待斃斯爲誤矣今博採羣經以爲上下二卷廣設備擬好養生者可得詳焉 小品曰古今相傳稱傷寒爲難治之疾時行溫疫是毒病之氣而論治者不判傷寒與時行溫疫爲異氣耳云傷寒是雅士之辭天行溫疫是田舍間號耳

不說病之異同也考之衆經其實殊矣所宜不同方說宜辨是以略述其要經言春氣溫和夏氣暑熱秋氣清涼冬氣凜冽此四時正氣之序也冬時嚴寒萬類深藏君子固密則不傷於寒或觸冒之者乃爲傷寒耳其傷於四時之氣皆能爲病而以傷寒爲毒者以其最爲殺厲之氣也中而卽病名曰傷寒不卽病者其寒毒藏於肌骨中至春變爲溫病至夏變爲暑病暑病熱極重於溫也是以辛苦之人春夏多溫病熱病者皆由冬時觸冒寒冷之所致非時行之氣也凡時行者是春時應暖而反大寒夏時應熱而反大冷秋時應涼而反大熱冬時應寒而反大溫此非其時而有其氣是以一歲之中病無長少多相似者此時行之氣也傷寒之逐日深淺以施方治今世人得傷寒或始不早治或治不去病或日數久淹困乃告師苟依方次第而療則不中病皆宜臨時消息制方乃有效耳 華佗曰夫傷寒始得一日在皮當摩膏火灸之卽愈若不解者二日在膚可依法鍼服解肌散發汗汗出卽愈若不解至三日在肌復一發汗卽愈若不解者止勿復發汗也至四日在胸宜服藜蘆丸微吐之則愈若病困藜蘆丸不能吐者服小豆瓜蒂散吐之則愈也視病尙未醒醒者復一法鍼之五日

在腹六日入胃入胃乃可下也若熱毒在外未入於胃而先下之者其熱乘虛入胃卽爛胃也然熱入胃須要下去之不可留於胃中也胃若實熱爲病三死一生皆不愈胃虛熱入爛胃也其熱微者赤斑出此候五死一生劇者黑斑出者此候十死一生但論人有強弱病有難易得效相倍也得病無熱但狂言煩躁不安精彩言語不與人相主當者勿以火迫之但以猪苓散一方寸七服之當逼與新汲水一升或二升強飲之令以指

喉中吐之病隨手愈若不能吐者勿強與水水停則結心下也當更以餘藥吐之皆令相主不爾更致危矣若此病輩不時以豬苓散吐解之者其死殆速耳亦可先去毒物及法鍼之尤佳夫飲膈實者此皆難治此則三死一生也病者過日不以時下則熱不得泄亦胃爛斑出春夏無大吐下秋冬無大發汗法冬及始春大寒時宜服神丹丸亦可摩膏火灸若春末及夏月始秋此熱月不宜火灸及重覆宜服大物青散若崔文行度瘴散赤散雪煎亦善若無丸散及煎者但單煮柴胡數兩傷寒時行亦可服以發汗至再三發汗不解當與湯實者轉下之其脈朝夕缺者為澀實也朝平夕缺者非澀也轉下湯為可早與但當少與勿令大下耳少與當數其間也諸虛煩熱者與傷寒相似然不惡寒身不疼痛故知非傷寒也不可發汗頭不痛脈不緊數故知非裏實不可下也如此內外皆不可攻而強攻之必遂損竭多死難全也此虛煩但當與竹葉湯若嘔者與橘皮湯一劑不愈為可重與也此法數用甚有效驗傷寒後虛煩亦宜服此湯 王叔和曰夫陽盛陰虛外臺作表和裏病 汗之則死下之則愈陽虛陰盛外臺作裏和表病 下之則死汗之則愈夫如是則神丹安可以誤發甘遂何可以妄攻虛盛之治外臺作表裏之病 相背千里吉凶之機應若影響然則桂枝下咽陽盛則斃外臺作表和則斃 承氣入胃陰盛以外臺作裏平 若此陰陽虛實之交錯其候至微發汗吐下之相反其禍至速而醫術淺狹不知不識病者殞沒自謂以凶 其分至令冤魂塞於冥路天死盈於曠野仁愛鑿茲能不傷楚夫傷寒病者起自風寒入於腠理與精氣分爭榮衛否隔周行不通病一日至二日氣在孔竅皮膚之間故病者頭痛惡寒腰背強重此邪氣在表發汗則愈

三日以上氣浮在上部填塞胸心故頭痛胸中滿當吐之則愈五日以上氣沉結在臧故腹脹身重骨節煩疼當下之則愈明當消息病之狀候不可亂投湯藥虛其胃氣也經言脈微不可吐虛細不可下又夏月亦不可下也此醫之大禁也脈有沉浮轉能變化或人得病數日方以告醫雖云初覺視病已積日在身其疹癩結成非復發汗解肌所能除當診其脈隨時形勢救解求免也不可苟以次第爲固失其機要乃致禍矣此傷寒次第病三日以內發汗者謂當風解衣夜臥失覆寒濕所中并時有疾疫賊風之氣相染身爲邪惡所中也至於人自飲食生冷過多腹臑不消轉動稍難頭痛身溫其脈實大者便可吐下之不可發汗也。陳廩邱云或問得病連服湯藥發汗汗不出如之何答曰醫經云連發汗汗不出者死病也吾思之可蒸之如蒸中風法熱濕之氣於外迎之不得不汗出也後以問張苗苗云曾有人作事疲極汗出臥單篋中冷得病但苦寒俗諸醫與丸散湯四日之內凡八過發汗汗不出苗令燒地布桃葉蒸之卽得大汗於被中就粉傅身使極燥乃起便愈後數以此發汗汗皆出也人性自有難汗者非惟病使其然也蒸之則無不汗出也諸病發熱惡寒脈浮洪者便宜發汗溫粉粉之勿令遇風當發汗而其人適失血及大下利則不可大汗也當少與桂枝湯使體潤發熱汗出連日當自解也。論曰凡人有少苦似不如平常卽須早道若隱忍不治冀望自瘥須臾之間以成固疾小兒女子益以滋甚若時氣不和當自戒謹若小有不和卽須治療尋其邪由及在腠理以時早治鮮不愈者患人忍之數日乃說邪氣入臑則難可制止雖倉扁亦無能爲也癰疽疔腫喉痹客忤尤爲其急此自養生之

要凡作湯藥不可避晨夜時日吉凶覺病須臾即宜便治不等早晚則易愈矣服藥當如方法若縱意違師不須治之凡傷寒多從風寒得之始表中風寒入裏則不消矣未有溫覆而尚不消也凡得時氣病五六日而渴欲飲水飲不能多不當與也所以爾者腹中熱尚少不能消之便更爲人作病矣若至七八日大渴欲飲水者猶當依證而與之與之勿令極意也言能飲一斗者與五升若飲而腹滿小便澀若喘若噦不可與之忽然大汗出欲自愈也人得病能飲水欲愈也 凡溫病可鍼刺者五十九穴又身之穴六百五十有五其三十六穴灸之有害七十九穴刺之爲災 論曰夫尋方學之要以救速爲貴是以養生之家須預合成熟藥以補倉卒之急今具之於左

辟溫第二方三十三首
濕瀉病證

屠蘇酒 辟疫令人不染溫病及傷寒之方

大黃十五銖

白朮

桂心

各十銖

桔梗

蜀椒

各十銖

烏頭

六銖

菝葜

十二銖

右七味咬咀絳袋盛以十二月晦日中懸沉井中令至泥正月朔旦平曉出藥置酒中煎數沸於東

向戶中飲之屠蘇之飲先從小起多少自在一人飲一家無疫一家飲一里無疫飲藥酒得三朝暹滓置井中能仍歲飲可世無病當家內外有井皆悉著藥辟溫氣也 一方有防風一兩○又方 正月旦取東行

桑根如指長七寸以丹塗之懸門戶上又令人帶之○又方 正旦吞麻子赤小豆各二十七粒又以二十

七粒投井中○又方 常以七月七日合家吞赤小豆向日吞二十七枚○又方 七月七日男吞大豆七枚

女吞小豆二七枚○又方 神仙教人立春後有庚子日温燕菁瀝汁合家大小並服不限多少

太乙流金散 辟温氣方 雄黃三兩雌黃二兩礬石一兩半 鬼箭羽一兩半 羚羊角燒二兩 右五味治下篩三

角絳袋盛一兩帶心前并挂門戶上若逢大疫之年以月旦青布裏一刀圭中庭燒之温病人亦燒熏之

雄黃散 辟温氣方 雄黃五兩硃砂 菖蒲 鬼臼各二兩 右四味治下篩以塗五心額上鼻人中及耳門

殺鬼燒藥方 辟温氣 雄黃 丹砂 雌黃各一斤 羚羊角殺羊角亦得 蕪荑 虎骨 鬼臼 鬼箭羽 野丈人

即白頭翁石長生 瓊猪屎 馬懸蹄各二兩 青羊脂 菖蒲 白朮各八兩 蜜蠟八斤 右十六味末之以蜜蠟和

為丸如彈許大朝暮及夜中戶前微火燒之

虎頭殺鬼圓 辟温方 虎頭五兩 硃砂 雄黃 雌黃各一兩半 鬼臼 皂莢 蕪荑各一兩 右七味末之以蜜

蠟和為丸如彈子大絳袋盛繫臂男左女右懸屋四角晦望夜半中庭燒一圓

辟温殺鬼圓 熏百鬼惡氣方 雄黃 雌黃各二兩 龍骨 龜甲 鱖鯉甲 蝟皮各三兩 殺羊角 虎骨各七兩

楊雞十五枚 空青 一兩芎藭 眞珠各五兩 東門上雞頭一兩 右十三味末之煇蠟二十兩并手圓如梧子正

且門戶前燒一圓帶一圓男左女右辟百惡獨宿弔喪問病各吞一圓小豆大天陰大霧日燒一丸於戶牖

前佳

雄黃圓 漢建炎二年太歲在酉疫氣流行死者極眾有書生丁季迴從蜀青城山來東過南陽從西市門入

見患疫癘者頗多遂於囊中出藥人各惠之一圓靈藥膏唇疾無不瘥市中疫鬼數百餘見書生施藥悉皆驚怖而走乃有鬼王見書生謂有道法兼自施藥感眾鬼等奔走若是遂詣書生欲求受其道法書生曰吾無道法乃囊中之藥呈於鬼王鬼王親藥驚惶叩頭乞命而走此方藥帶之入山能辟虎狼蛇蟲入水能除水怪蛟蜃 雄黃 雌黃 曾青 鬼臼 眞珠 丹砂 虎頭骨 楮梗 白朮 女青 芎藭 白芷 鬼督郵 蕪荑 鬼箭羽 藜蘆 菖蒲 皂莢各一兩 右十八味末之蜜丸如彈子大絹袋盛男左女右帶之卒中惡病及時疫吞如梧子一丸燒彈大一丸戶內

赤散 辟温疫氣傷寒熱病方 藜蘆 躑躅花各一兩 丹皮 皂莢各一兩 附子 桂心 眞珠各六銖 細辛

乾薑各十銖 右九味末之內眞珠合治之方一寸七絳置囊中帶之男左女右著臂自隨覺有病之時便

以粟米大內著鼻中又酒服一錢七覆取汁日三服當取一過汗耳○又方 凡時行疫癘常以月望日細剉東引桃枝煮湯浴之

粉身散 辟温病常用方 芎藭 白芷 藜蘆各等分 右三味治下篩內米粉中以粉身

斷温疫轉相染著乃至滅門延及外人無敢視者方 赤小豆 鬼箭羽 鬼臼 雄黃各二兩 右四味末之

以蜜和服如小豆一丸可與病人同牀無妨

預備一物柏枝散 天氣不和疾病流行方 取南向社中柏東南枝曝令乾搗末酒服方寸七神良

治温病不相染方 以桃樹中蠹屎煮之水服方寸七 ○又方 朮鼓等分酒浸服之妙 ○又方 赤豆一

升新布袋盛內井中三日出舉家服二十七枚 ○又方 松葉煮之酒服方寸七日三服

治温令不相染方 新布袋盛大豆一升內井中一宿出服七枚 ○又方 白蜜和上色砂硃粉一兩以太歲

日平旦大小勿食向東方立吞服三七丸如麻子大勿令齒近之并吞赤小豆七枚投井泉中

治瘴氣方

蒜五十并皮碎之 豉心一升

右二味以三歲男兒屎二升煮五六沸去滓服之

蒜疑葱之誤

○又方 青竹

茹二升以水四升煮取三升分作三服

〔衍義〕辟温諸方有歲時預防而設有時氣不正而設然有內服有外佩有焚燒有懸挂有內鼻擊臂粉身

浴體及投井中種種不同總取辟除惡毒異氣之義屠蘇酒方中首取大黃推陳致新白朮安中正氣桔梗

升清降濁蜀椒辟邪下氣桂心破陰助陽烏頭祛邪辟惡菝葜逐穢除邪七味藥中惟藉烏頭為主帥椒桂

左右輔弼白朮守營大黃奪塞桔梗菝葜中外宣使一本有防風酒煎向東飲取其生氣隔歲置井中盡室

均沾之意 自東行桑根方至蕪菁茹汁六方皆歲時預防之法 自太乙流金丹至粉身散九方咸用雄

黃硃砂鬼臼鬼箭虎頭羚羊等藥皆時氣不正辟邪之方 自斷温疫至青竹茹十方皆吞服小方廣收以

便取用原無分於彼此也

治患霧氣者心內煩悶少氣頭痛項急起則眼眩欲倒身微熱戰掉不安時復憎寒心中欲吐吐時無物方

新猪屎二升半內好酒一升攪令散以生布絞取汁更以綿瀝頓服之取盡卽地鋪暖臥覆蓋鋪前著火常汗出若得汗當細細去上衣勿使心寒寒卽不瘥看汗自乾乃起慎風冷亦治瘡及風勞蟲毒

〔衍義〕霧從地濕蒸發皆平時所受穢惡之氣發則迷漫大地卽時氣鬱蒸之類壯者氣勝無傷怯者著而成病則有煩心頭痛目眩身熱欲吐等證長沙所謂陽中霧露之氣故取水獸之遺以辟水土之邪服後臥地向火取汗使鬱蒸之氣仍從上解嘗見嬰孩麻疹著寒陷伏喘脹兒科用猪屎大桶沸湯中置牀篋下熱蒸如霧夏久通身得汗麻卽汗發藥所不及而此能療之勿以穢惡而鄙棄不錄也

治肝腑臟温病陰陽毒頸背雙筋牽先寒後熱腰強急縮目中生花方 桂心一兩 白朮 芒硝 大青 梔

子各三兩 柴胡五兩 石膏各八兩 生薑各八兩 生地黃 香豉各一升 右十味咬咀以水九升煮取三升分三服

治肝腑臟温病陰陽毒先寒後熱頸筋攣牽面目赤黃身中直強方 元參一兩 細辛二兩 梔子 黃芩 升

麻 芒硝各三兩 石膏八兩 竹葉切五升 車前草曝切二升 右九味咬咀以水一斗半煮竹葉車前取七升去滓下

諸藥煎至三升內芒硝分三服

治心腑臟温病陰陽毒戰掉不安驚動方 大青 黃芩 梔子 知母 芒硝各三兩 麻黃四兩 元參六兩 石

膏 生葛根各八兩 生地黃切一升 右十味咬咀以水九升煮取三升去滓內芒硝分三服

治脾腑臟温病陰陽毒頭重頸直皮肉痺結核臙起方 大青 羚羊角 升麻 射干 芒硝各三兩 梔子

四兩寒水石五兩元參八兩 右八味咬咀以水七升煮取三升分三服

治肺腑臟温病陰陽毒咳嗽連續聲不絕嘔逆方 麻黃 梔子 紫苑 大青 元參 葛根各三兩 桂心

甘草各二兩 杏仁 前胡各四兩 石膏八兩 右十一味咬咀以水九升煮取三升分三服

治腎腑臟温病身面如刺腰中欲折熱毒內傷方 茵陳蒿 梔子 芒硝各二兩 苦參 生葛各四兩 生地黃

石膏各八兩 葱白 豉各一升 右九味咬咀以水九升煮取二升半下芒硝分三服

〔衍義〕温病從內發外雖有臟腑之分却無陰陽之辨以邪伏身中既久內外血氣無不受其蘊毒也其首

言肝腑臟病肝與膽合膽為陰陽之樞所以證先寒後熱項背筋急等患肝藏血故以生地黃涼血之味統

大青石膏梔子芒硝疎其宿蘊之毒桂心柴胡香豉生薑泄其在經之熱白朮斷其復入之路也 其第二

方亦證見寒熱有面目黃赤似乎木邪乘土究竟肝熱居多故於芒硝石膏梔子黃芩元參蕩熱藥中略兼

升麻細辛透達經邪車前竹葉并通滲道以開泄熱之路也 心腑臟温却無寒熱而見戰掉火之象也心

主血故亦用生地黃統攝大青石膏梔子芒硝及元參黃芩與肝腑臟無異以心部於表故用麻黃開發肺

氣以散在表之熱葛根知母輔石膏流行胃津以滋火氣之燔灼也 脾腑臟温而證見頭重頸直皮肉癢

結故用射干散結氣羚羊角辟惡毒不祥大青梔子元參芒硝寒水石以攻熱毒升麻引入脾經也 肺腑

臟温而見咳嗽嘔逆是肝病而兼胃熱毒逆也大青石膏梔子元參乃治温專藥麻黃桂心杏仁前胡紫苑

甘草泄肺專藥葛根非佐石膏解利陽明之熱乎 腎腑臟溫而證見熱毒內傷腰中欲折不用知母反用茵陳苦參祛滌濕熱之味佐石膏芒硝生地黃以辟毒邪專取香豉以靜少陰之源梔子以除膈上之煩生葛以行胃中之津葱白以通陰中陽氣也

葳蕤湯

治風溫之病脈陰陽俱浮汗出體重其息必喘其形狀不仁嚙嚙但欲眠下之者則小便難發其汗

者必讞語加燒鍼者則耳聾難言但吐下之則遺失便利如此疾者宜服之方 葳蕤 白薇 麻黃 獨

活 杏仁 芎藭 甘草 青木香各三兩 石膏五兩 右九味咀咀以水八升煮取三升去滓分三服取汗

若一寒一熱加朴硝一分及大黃三兩下之小品方云葳蕤湯治冬溫及春月中風傷寒則發熱頭腦痛咽喉乾舌強骨肉疼心胸痞滿腰背強

〔衍義〕風溫之病長沙但言脈證而無治療之方千金補所未逮特立葳蕤湯為專藥蓋風溫由溫病誤發

其汗而成經言太陽病發熱而渴者為溫病若發汗已身灼熱者為風溫此兩節一氣貫下陳氏不當以註

釋間斷致後人作兩截看意謂風溫別是一證多生疑障且本例後一逆尚引日再逆促命期等語以為不

可救藥束手待斃也原夫冬時之邪伏藏少陰至春發動必循太陽之經時當風木主令內火招風最為巨

測縱不因風亦必繇少陽而尋出路况經誤汗非惟不解身反灼熱其脈尺寸俱浮蓋腎脈本當沉也風溫

載之從太陽上入根本撥而枝葉紊矣其證自汗身重多眠鼻鼾語難一皆腎之本病詎意發熱之初不及

理脈輕犯汗戒腎中伏邪從風外擾灼熱漫無止期胃中熱甚讞語不休神識不能主持可知若被下者小

便不利直視失溲膀胱氣化受傷與少陰同時告竭也被火者微則熱傷營氣而瘀熱發黃劇則熱甚生風而如驚癇時瘕癰火熱亂其神明擾其經脈也加燒鍼則耳聾難言但吐少陰伏火上攻本經之竅也少陰脈系咽喉乾痛乃至吐逆唾血多死一逆發汗已是引日待斃再逆火迫神丹莫救矣內經刺熱論溫營交之後病內連腎評熱論溫專言穀氣腎中精勝得汗則生腎中精敗更熱則死長沙更出不盡之藏論腎更視膀胱以緯之膀胱氣化受傷則直視失溲命門精氣告竭神水不能照物其能生乎千金體究長沙餘蘊悟得發汗後汗出而喘無大熱者可與麻黃杏仁甘草石膏湯借此以治溫病汗後灼熱兼取麻黃升麻湯中葳蕤合麻杏甘草僅取方中四味而麻黃升麻湯之格局儼然葳蕤滋腎益肺內化厥陰火熱外通少陽風氣佐石膏以降逆滿獨活芎藭杏仁佐麻黃以解鬱蒸得石膏之寒化不獨解表并能散火甘草一味專和麻黃杏仁之性也此方中葳蕤白薇青木香石膏自是一路為方中之主麻黃杏仁芎藭獨活自是一路為方中之賓作兩路看方得賓主歷然之妙深得風溫主治之奧即更過於風變為風溫之病則當以葛根黃芩黃連湯為主治葳蕤湯加減尤為合宜多有熱傷津液無大熱而渴者不妨裁去麻杏易入葱豉以通陽鬱栝藿以滋津液喘息氣上芎獨亦勿輕試虛不勝寒石膏難以概施或以竹葉清心茯苓守中則補救備至於以補千金之未逮

傷寒膏第三方一首

青膏 治傷寒頭痛項強四肢煩疼方 當歸 芎藭 蜀椒 白芷 吳茱萸 附子 烏頭 甘草各三兩

右八味咬咀以醋苦酒漬之再宿以豬脂四斤煎令藥色黃絞去滓以溫酒服棗核大三枚日三服取汗不知稍增可服可摩如初得傷寒一日苦頭痛背強宜摩之佳

黃膏 治傷寒赤色頭痛項強賊風走注方 大黃 附子 細辛 乾薑 蜀椒 桂心各半兩 巴豆七枚

右七味咬咀以醋苦酒漬一宿以臘月豬脂一斤煎之調適其火三上三下藥成傷寒赤色發熱酒服如梧子大一枚又以火摩身數百過兼治賊風絕良風走肌膚遊風所在摩之神效此趙泉方也

白膏 治傷寒頭痛向火摩身體酒服如杏核一枚溫覆取汗摩身當干過藥力乃行并治惡瘡小兒頭瘡牛領馬鞍皆治之先以鹽湯洗之以布拭之傅膏攤腫火灸摩干過日再自消者方 天雄 烏頭 莽草

羊躑躅各三兩 右四味咬咀以苦酒三升漬一宿作東向露竈又作十二聚濕土各一升許大取成煎豬脂

三斤著銅器中加竈土炊以葦薪令釋內所漬藥炊令沸下著土聚上沸定復上如是十二過令土盡遍藥成去滓傷寒咽喉痛含如棗核一枚日三摩時令勿近目

〔衍義〕西北風氣剛勁腠理緻密故取辛熱製膏摩服兼進內外透達以治冬時正傷寒寒氣嚴凝之病東南陽氣易動良非所宜即使西北伏氣發於春夏者咸為切禁

發汗散第四方十一首

度瘴發汗青散 治傷寒赤色惡寒發熱頭項強體疼方 麻黃三兩 桔梗 細辛 吳茱萸 防風 白

朮各一兩 烏頭 乾薑 獨椒 桂心各一兩 右十味治下篩溫酒服方寸七溫服取汗汗出止若不得汗

汗少不解復服如法若得汗足如故頭疼發熱此為內實當服散丸若霍氏解散如得便頭重者可以二

大豆許內鼻孔中覺燥涕出一日可三四度必愈兼辟時行病

〔衍義〕汗散十餘方病因不同毫釐不辨相背千里如度瘴青散乃治山嵐瘴氣之方雖用麻黃草防桔透

表發汗全賴烏桂椒薑黃朮溫中散邪專為面赤戴陽而設設服之不應頭疼發熱如故此必有實邪固

結又為陽明病面合赤色急須駛散丸迅掃中外不當以面赤為虛陽上泛而致扼腕也

五苓散 主時行熱病但狂言煩躁不安精彩言語不與人相當者方 猪苓 白朮 茯苓各十銖 桂心十二銖

澤瀉三十銖 右五味治下篩水服方寸七日三多飲水汗出即愈

〔衍義〕五苓散本太陽熱邪犯本及水逆煩渴之方千金借治時行熱病之熱乘心主狂言煩躁精采不與

人相當取桂心為嚮導引領諸邪從水道開泄也又主瘦人臍下有悸吐涎沫癩眩而濕熱發黃亦取用之

金匱方加茵陳尤為合轍

崔文行解散 治時氣不和傷寒發熱者方 桔梗 細辛各四兩 白朮八兩 烏頭一斤 右四味治下篩若中

傷寒服錢五七覆取汗解若不覺復小增之以知為度若時氣不和日服錢五七辟惡氣欲省病者服一服

皆酒服

〔衍義〕時行有冬春之不同南北之區別此專主西北冬時時氣不正之病以西北風高氣烈非烏頭風藥不能通達嚴厲之氣佐以白朮實脾杜風細辛內搜經絡桔梗外開皮腠也

六物青散

治傷寒赤色惡寒方

附子

白朮各一兩六銖

防風

細辛各一兩十八銖桔梗

烏頭各三兩十八銖

右六味

治下篩以溫酒服五七不知稍增之服後食頃不汗出者進溫粥一杯以發之溫覆汗熱可也勿令流離勿出手足也汗出止若汗大出不止者溫粉粉之微者不須粉不得汗者當更服之得汗而不解者當服神

丹丸

〔衍義〕青散即前解散加附子防風以搜少陰之邪專為面赤戴陽而設得汗不解當服神丹專取半夏烏頭反激以祛寒氣厥逆也

青散

治春傷寒頭痛發熱方

苦參

厚朴

石膏各三兩十銖

大黃

細辛各二兩

麻黃五兩烏頭五枚

右七味

治下篩覺傷寒頭痛發熱以白湯半升和藥方寸匕投湯中熟訖去滓盡服覆取汗汗出溫粉粉之良久一服不除宜重服之或當微下利者有大黃故也

〔衍義〕青散專治西北傷寒內外熱邪交結故首取苦參以治心腹結氣佐厚朴石膏大黃開泄於內細辛

麻黃開發於外苦參得烏頭共解心腹寒熱互結之邪也

詔書發汗白薇散 治傷寒三日不解者方 白薇十一銖 杏仁 貝母各十銖 麻黃一兩八銖 右四味治下篩酒服

方寸七自覆汗出即愈

〔衍義〕此於麻黃湯中以白薇之苦泄易桂枝貝母之甘寒易甘草治傷寒三日不解既散表邪兼解內熱 麻黃湯之變法也

華佗赤散 治傷寒頭痛身熱服背強引頸及中風口噤瘧不絕婦人產後中風寒經氣腹大方 丹砂十二銖

蜀椒 蜀漆 乾薑 細辛 黃芩 防己 桂心 茯苓 人參 沙參 桔梗 女萎即萎蕤 烏頭各十銖

雄黃二十銖 吳茱萸三十銖 麻黃 代赭各二兩半 右十八味治下篩酒服方寸七日三耐藥者二七覆令汗出欲

治瘧先發一時所服藥二七半以意消息之細辛薑桂丹砂雄黃不熬餘皆熬之

〔衍義〕麻烏辛桂椒薑茱萸一派辛溫散表藥中而兼黃芩女萎砂桔防己清解麻烏等熱毒參苓守五臟 真氣丹砂雄黃性雖重著得麻烏薑辛鼓舞之力當無鬱遏邪氣之虞代赭鎮攝逆氣本經有治賊風蠱毒 腹中毒邪女子赤沃漏下之功蜀漆專主寒熱痰積故可兼治瘧證之寒熱不絕

赤散 治傷寒頭痛項強身熱腰痛往來有時方 乾薑 防風 沙參 細辛 白朮 人參 蜀椒

茯苓 麻黃 黃芩 代赭 桔梗 吳茱萸各一兩 附子一枚 右十四味治下篩先食酒服一錢七日三

〔衍義〕即前華佗赤散中除去丹砂雄黃烏頭蜀漆防己桂心女萎而易白朮附子防風與前方格局雖同

頭緒頗清方中白朮卽前方之茯苓附子卽前方之烏頭防風卽前方之防己也

烏頭赤散 治天行疫氣病方 烏頭一兩 皂莢半兩 雄黃 細辛 桔梗 大黃各一兩 右六味治下篩清

酒或并花水服一斗圭日二不知稍增以知爲度除時氣疫病若牛馬六畜中水行疫亦可與方寸七人始得病一日時服一斗圭取兩大豆許吹著兩鼻孔中

〔衍義〕此治天行疫氣之病故用烏頭雄黃辟除邪毒於內細辛桔梗開發經氣於上皂莢大黃降泄熱毒於下也

水解散 治時行頭痛壯熱一二日方 桂心 甘草 大黃各二兩 麻黃四兩 右四味治下篩患者以生熟

湯浴訖以暖水服方寸七日三覆取汗或利便瘥力強人服一方寸七延年祕錄有黃芩芍藥各二兩古今錄驗無甘草有芍藥治天行熱病生

痘瘡疼痛及解肌出汗

〔衍義〕此於麻黃湯中除去杏仁而易大黃是汗劑而兼下法從桂枝大黃湯化出中風門中三化湯則於承氣湯加羌活乃下劑而兼汗法又從此方變出

治時病表裏大熱欲死方 大黃 寒水石 芒硝 石膏 升麻 麻黃 葛根 紫葛各等分 右八味治

下篩水服方寸七日二

〔衍義〕大黃石膏芒硝寒水石治裏之大熱麻黃升麻葛根紫葛治表之大熱亦當作賓主兩路看一本無

紫葛有甘草取其聯合賓主也

發汗湯第五例一首 方十九首

例曰大法春夏宜發汗凡發汗欲令手足皆周至皦然一時間許益佳但不可如水流離震聳耳若病不解當更重發汗汗出多則亡陽陽虛不可重發汗也凡服湯藥發汗中病便止不必盡劑也凡云可發汗而無湯者圓散亦可用要以汗出爲解然不及湯隨證夏驗凡病無故自汗出復發其汗愈衛復和故也 夫脈浮者病在外可發汗宜桂枝湯 夫陽脈浮大而數者亦可發汗宜桂枝湯 夫病常自汗出者此爲營氣和營氣和而外不解此爲衛氣不和也營行脈中衛行脈外復發其汗衛和則愈宜桂枝湯 夫病人臟無他病時時發熱自汗出而不愈者此衛氣不和故也先其時發汗則愈宜桂枝湯 太陽病發熱汗出者此爲營弱衛強故令汗出欲救邪風宜桂枝湯 太陽病頭痛發熱汗出惡風寒宜桂枝湯 太陽病下之微喘者表未解也宜桂枝加厚朴杏仁湯 太陽病外證未解者不可下宜桂枝湯 太陽病先發其汗不解而復下之其脈浮者不愈浮爲在外而反下之故令不愈今脈浮故知在外當須解表則愈宜桂枝湯 太陽病下之氣上衝者可與桂枝湯不上衝不可與 凡桂枝本爲解肌若脈浮緊發熱無汗者勿與之常知此勿誤也

桂枝湯

治中風其脈陽浮而陰弱陽浮者熱自發陰弱者汗自出漹漹惡風淅淅惡寒翕翕發熱鼻鳴乾嘔

方 桂枝 芍藥

生薑

各三兩

甘草

二兩

大棗

十二枚

右五味咀咀三物切薑棗以水七升煮棗令爛去

滓乃內諸藥水少者益之煮令微沸得三升去滓服一升日三小兒以意減之初服少多便得汗出者小關其間不得汗者小促其間令藥勢相及汗出自護如法特須避風病若重宜夜服若服一劑不解病證不變者當復服之至有不肯汗出服兩三劑乃愈服此藥食頃飲熱粥以助藥力

〔衍義〕桂枝湯古稱湯液之祖太陽經風傷衛之首方風傷於陽所以脈浮發熱邪迫於陰所以脈弱自汗瀄瀄惡風淅淅惡寒翕翕發熱皆自汗表虛之徵驗非若寒傷營之壯熱身疼也鼻鳴乾嘔者陽邪上攻漸次欲傳陽明之界故桂枝和營達衛芍甘護營守中薑棗助桂芍以除寒熱服後啜熱稀粥助力取汗不使復傳他經至於隨證加減信手成方但看太陽經諸例便得長沙之妙用無窮何憚心手不靈活乎

麻黃湯

治傷寒頭及腰痛身體骨節疼發熱惡寒不汗而喘方

麻黃三兩桂枝

甘草

各二兩杏仁七十枚喘不甚

用五
十枚

石四味咬咀以水九升煮麻黃減二升去沫內諸藥煮取二升半絞去滓服八合覆令汗

〔衍義〕

麻黃湯太陽經寒傷營之專藥寒氣剛勁故令脈緊營受邪鬱所以壯熱熱蒸於上所以頭痛骨節

煩疼而喘皆熱邪內鬱不得汗泄之故故用麻黃杏仁開發肺氣於上桂枝甘草調和營血於內不使隨汗外脫脫或尺中遲微又為營虛血少不能勝任麻黃即當改用小建中以中有膠飴助胃蒸發可無以陽厥逆之虞也

大青龍湯

治中風傷寒脈浮發熱惡寒身體疼痛汗不出煩躁方

麻黃六兩桂心

甘草

各二兩石膏雞

子一生薑三兩杏仁四十枚大聚十二枚

右七味咀咀以水九升煮麻黃去沫乃內諸藥煮取三升分服一升

厚覆當大汗出溫粉粉之即止不可再服服之則筋惕肉瞤此為逆也不汗乃再服

〔衍義〕麻黃湯專主寒傷營之無汗脈緊桂枝湯專主風傷衛之自汗脈緩二湯雖同為太陽經藥而實開

發心肺之邪青龍湯專主營衛俱傷以喻龍之兩角能通營衛兩岐也三方勢若鼎分故千金並列湯液之

首詳方下所云全是寒傷營之麻黃湯證惟不汗出而煩躁與無汗而喘稍有分別蓋寒邪拒閉則無汗風

邪疎豁則汗泄今風寒兩傷又以寒重風輕雖風邪欲作汗解而寒邪固閉不得出所以煩躁不寧與寒傷

營之但喘而不躁擾神氣自能主持則有輕重之分恐人不能辨晰反以中風二字首為招揭千金又以中

風傷寒疊舉開示總不出大青龍之桂枝麻黃二湯合治也然營衛俱傷亦有風重寒輕而見脈浮緩不

緊身但重不疼且乍有輕時一一見證似乎風傷衛象即身重一證明非陽受風邪且乍有輕時又非營傷

身疼變急之比洵為寒輕風重無疑猶恐醫師不察反以傷寒二字目之故拋疑團欲人深切致思庶無輕

舉妄治之失以風傷衛證居多故於桂枝湯中除去薑棗加麻黃乾薑細辛半夏滌痰治咳五味子收斂津

氣則小青龍為至當觀金匱治咳逆倚息不得臥用小青龍下已猶不出桂苓五味甘草等味陳註傷寒論

誤作大青龍發之非但滋誤後學抑且紊亂聖經愚不自揣敢力正之世之知我罪我所不惜也

陽毒升麻湯 治傷寒一二日便成陽毒或服藥吐下之後變成陽毒身重腰痛煩悶不安狂言或走或見

鬼或吐血下痢其脈浮大數面赤斑斑如錦文咽喉痛唾膿血五日可治至七日不可治宜服方 升麻

甘草各半兩 當歸 蜀椒 雄黃 桂心各六銖 右六味咬咀以水五升煮取二升半分三服如人行五里進

一服溫覆手足毒出則汗汗出則解不解重作服之得吐亦佳仲景無桂心有鱉甲手大一片肘後與千金同古今錄驗有梔子六銖鱉甲如手一片

陰毒甘草湯 治傷寒初起一二日便結成陰毒或服藥六七日已止至十日變成陰毒身重背強腹中絞痛

咽喉不利毒氣攻心心下堅強短氣不得息嘔逆唇青面黑四肢厥冷其脈沉細緊數仲景云此陰毒之候

身如被打五六日可治至七日不可治也方 甘草 升麻各半兩 當歸 蜀椒各六銖 鱉甲一兩 右五味咬

咀以水五升煮取二升半分三服如人行五里頃更進一服溫服發汗毒當從汗出汗則愈若不汗則不

除重作服仲景方無蜀椒

〔衍義〕按陽毒陰毒治例長沙不入傷寒而列之於金匱者以見證龐雜六經例中無一可歸乃次之於百

台狐惑證下首言陽毒之病面赤斑斑如錦紋咽喉痛唾膿血五日可治七日不可治升麻鱉甲湯主之次

言陰毒之為病面目青身痛如被杖咽喉痛五日可治七日不可治升麻鱉甲湯去雄黃蜀椒主之或問陽

毒發斑大熱何反恣用辛烈陰毒面青身痛何反除去蜀椒雄黃願聞其義何居因謂之曰夫陰陽二毒一

皆熱毒極甚故五日可治七日當死其毒在陽分則面赤斑如錦文以毒邪亢極若用寒藥折之非徒扞格

不入必致烈焰飛騰崑崙滅頂惟有從治一法可望其毒隨焰息燭倖倖於萬一非故趨難險以誇奇特也

其毒陷陰分則面青身如被杖以熱邪內伏若用辛烈從治擔薪救焚以火濟火五內裂崩勢所必致然升散之法勢在必需溫順之法在所切戒因於升麻驚甲湯中除去雄黃蜀椒二味其在陽毒方中專解陽邪亢逆在陰毒方中恐其助火虐陰故除去不用僅取升麻之升散火氣當歸之通調營血驚甲之削肝護陰甘草之解毒安中其間取舍之機各有至理非深達長沙化機難以語此千金又以西北風高土厚升麻驚甲方中蜀椒雄黃性雖雄烈尚鮮辛散之功因去驚甲而易桂心更其方曰陽毒升麻湯以治陽毒面赤發斑之證又於陽毒升麻湯中除去雄黃桂心進用驚甲更其方曰陰毒甘草湯以治陰毒面青身如被杖之證則仍不離長沙之繩墨耳陰陽二毒證治瀕危所不待言設當風土柔弱天時和煦病人真陰不充因誤藥變成二證者又當從金匱原方未嘗不合於治也若夫陰寒極甚之陰毒則與中寒無異又當從事薑附不當與此牽合

陰旦湯 治傷寒肢節疼痛內寒外熱虛煩方

芍藥

甘草 各二兩 乾薑

黃芩 各三兩

桂心 四兩 大棗 十五枚

右六味咬咀以水一斗煮取五升去滓溫服一升日三夜二服令小汗

陽旦湯

治傷寒中風脈浮發熱往來汗出惡風頭項強鼻鳴乾嘔桂枝湯主之隨病加減如左方

以泉水

一斗煮取四升分服一升日三如汗者去桂枝加附子一枚渴者去桂加栝蠹三兩利者去芍藥桂加乾薑

三累附子一枚炮心下悸者去芍藥加茯苓四兩虛勞裏急正陽旦主之煎二升內膠飴半斤為再服若脈

浮緊發熱者不可與之

〔衍義〕陰旦者陰凝開霽之象病人中氣本虛而傷犯客邪表雖疼痛熱而內則虛寒故於桂枝湯中加乾薑黃芩分治本虛標熱則大氣布而胸次廓然如離照當空自然陰霾無著矣 陽旦者陽和敷布之象病人素稟偏陽而觸冒風氣裏不伏邪而外顯微熱故於陰旦湯中除去乾薑之助陽但取黃芩以化熱陰陽各得其平而無偏勝之厄然在素稟陽虛之人誤投禍不旋踵觀太陽例中傷寒脈浮自汗出二條則知陽旦之關係非細夫脈浮自汗出風傷衛證也風爲陽邪本當自汗以寒邪外閉不能透出半伏心包所以心煩微惡寒也小便數腳攣急又爲陽虛暗伏少陰危證於中也此本營衛俱傷恐人見其脈浮自汗誤認風傷衛證故長沙特以傷寒二字貫之例首非但陽旦桂枝不可誤與卽營衛俱傷之兼有少陰證者則大小青龍尤爲切禁惟小建中湯爲之合劑凡尺中微遲營氣不足血少之證總不出此然與陽旦祇爭一味妙在膠飴之甘緩不得助桂作汗抑且實脾隄水與陽旦方中黃芩苦寒閉邪傷犯中州功過天淵誤服陽旦而厥逆咽乾兩脛拘急者則參附子於桂枝湯中增桂令汗出以溫經復陽服後仍厥逆咽乾煩躁陽明內結讞語煩亂則桂附又難過與更作甘草乾薑以俟夜半陽回足溫而脛尙微拘急重與芍藥甘草湯爾乃脛伸復以承氣湯微溼止其讞語其間增劇變證多端總誤在黃芩一味所以百十三方此獨無預千金又取以治西北土厚氣勝素偏陽旺之人最爲合轍其陰旦湯中復取乾薑配合黃芩以治本寒標熱之證又從

甘草乾薑湯採入至於陽旦方後加附子加桂心總在挽回誤治增劇法來其治虛勞裏急用正陽旦詳一正字當是桂枝湯本方中納膠飴必無兼用黃芩之理世人但知桂枝湯加黃芩為陽旦湯不知方後增減皆陽旦之妙用也

六物解肌湯

治傷寒發熱身體疼痛方

葛根 四兩 茯苓 三兩 麻黃

牡蠣

生薑 各二兩

甘草 一兩

右六

味咬咀以水八升煮取三升分三服再服後得汗汗通即止

古今錄驗無生薑甘草

〔衍義〕葛根專開陽明肉腠然必兼麻黃用之以陽明之邪必循太陽出路也辛甘發散為陽生薑甘草在所必用牡蠣一味本經雖有傷寒寒熱溫瘧之治然性味鹹終非發散藥中所宜其柴胡龍骨牡蠣湯乃汗後邪犯少陽本藥此必發汗過多熱仍不解恐成漏風用以統攝茯苓內守藏氣外固津液使不隨麻葛外泄乃散中寓固之法斯義不講無人達此奧妙也

解肌湯

治傷寒溫病方

葛根

四兩

麻黃

三兩

黃芩

芍藥

甘草

各二兩

大棗

十二枚

右六味咬咀以水一

斗煮取三升飲一升日三服三四日不解脈浮者宜重服發汗脈沉實者宜以缺鼓丸下之

延年秘錄有桂心一兩

〔衍義〕黃芩湯四味本治溫病之方千金增入葛根麻黃專為風土剛勁腠理緻密而設設當水土柔弱之

方又當除去麻葛而進葱豉方得應機接物之妙觀後治疫氣傷寒三日已前不解方其義自明

治疫氣傷寒三日已前不解者方

香豉

一升

葱白

切一升

童子小便

三升

右三味先熬豉葱令相得則投小

便煮取二升分再服徐徐服之覆令汗神驗

〔衍義〕香豉專解虛人疫氣壯熱從少陰發越其邪兼葱白以通陽氣投小便中煮服總取穢惡之氣以辟穢惡之邪故冬溫病初發咸取用之但病久流入經絡臟腑有所留著者未有能應取効也

治傷寒時氣瘟疫疼痛壯熱脈盛始得一二日者方 丹砂一兩末之以水一斗煮取一升頓服之覆取汗

〔衍義〕本經言丹砂治身體五臟百病以其能攝伏諸邪也但時氣始得一二日間無形之時受病用之乃効若日久有所留著恐無濟於用也

解肌升麻湯 治時氣三四日不解方 升麻 芍藥 石膏 麻黃 甘草各一兩 杏仁三十枚 貝齒三枚一作

銖 右七味㕮咀以水三升煮取一升盡服溫覆發汗便愈

〔衍義〕麻杏甘石湯本治發汗後汗出而喘無大熱者乃越婢湯之變方此治時氣三四日不解亦用此湯加升麻以治疫瘴芍藥以護營血貝齒以鎮邪毒與六物解肌湯中牡蠣同義取其鹹潤走血利水而鎮攝時氣之毒非正傷寒例藥也

葛根龍膽湯 治傷寒三四日不差身體煩疼而熱方 葛根八兩 龍膽 大青各半 升麻 石膏 葳蕤各

兩 甘草 桂心 芍藥 黃芩 麻黃各三兩 右十二味㕮咀以水一斗煮葛根取八升內餘藥煮取三升

分四服日三夜一

〔衍義〕此用麻黃升麻湯中八味彼兼乾薑白朮茯苓當歸佐麻黃升麻桂枝芍藥治傷寒六七日大下後邪伏至陰厥逆下利不止知母天門冬佐歲蕤黃芩石膏甘草治虛陽上逆咽喉不利唾膿血此兼葛根生薑佐麻黃升麻桂心芍藥治傷寒三四日不寤龍膽大青佐歲蕤黃芩石膏甘草治發汗後身體煩疼而熱預防斑黃變證也

治傷寒四五日頭痛壯熱四肢煩疼不得飲食方 梔子仁 黃連 黃柏 大黃各半兩 好豉一升葱白七莖

右六味咬咀以水八升煮上四物六七沸內後葱白豉煮得三升頓服一升日三服湯訖溫服令汗出粉之得汗便止後服勿復取汗不得汗者復服重發此藥無忌特宜老小神良

〔衍義〕方下雖云治傷寒四五日頭痛壯熱而實治溫熱病藥梔子豉湯加葱白專主伏氣發溫頭痛兼大黃黃連瀉心湯專治四肢煩熱心下痞滿不能飲食加黃柏者專淨邪伏少陰之毒也

七物黃連湯 治夏月傷寒四肢煩疼發熱其人喜煩嘔逆支滿劇如禍崇寒熱相搏故令喜煩方 黃連

茯苓 黃芩各十銖 芍藥 葛根各一兩 甘草一兩 小麥三合 右七味咬咀以水七升煮取三升冷分三服不

能一 者可稍稍服之湯勢安乃臥藥主毒氣服湯之後胸中熱及咽喉痛皆差明日復煮一劑如法服之

此湯無毒但除熱下氣安病人小兒服者取三分之一以水四升煮得二升稍稍服之

〔衍義〕葛根黃芩黃連湯本治太陽證誤下脈促胸滿喘汗引邪入犯陽明經證并治陽脈浮滑陰脈濡弱

更過於風變為風溫之病最為合宜此治夏月伏氣發溫熱劇昏亂之證故加茯苓以守藏氣芍藥以護營血小麥以通肝氣麥為肝家之穀也

三七湯 治傷寒中風得之三日至七八日不解胸脇痛四肢逆乾嘔水漿不下腹中宿食不消重下血一日

數十行方

茯苓

如雞子大

人參

各三兩

桔槩根

四兩

芒硝

乾地黃各一升

右九味搗篩令相得以散三方寸七水一升煮令三沸絞去滓服之日三溫覆汗出即愈病劇與六七

〔衍義〕此治風寒雜合傷外飲食壅滯傷內七八日胸脅痛四肢逆乃中氣內結不能傍達四末之候乾嘔

水漿不下宿食不消種種皆裏實蘊熱而迫血妄行不可以其四肢逆乾嘔疑似夾陰而致扼腕也方中麻

黃大黃地黃分治外內實結血熱妄行茯苓人參栝槩根助胃通津以行三藥之勢黃芩佐麻黃分解表熱

芒硝佐大黃疎滌裏實寒水石佐地黃滋降血滯取其鹹潤走血也

五香麻黃湯 治傷寒忽發腫或著四肢或在胸背虛腫浮如吹狀亦著頭面脣口頸項劇者偏著腳脛外如

軸大而不痛不赤著四肢者乃欲不遂悉主之方 麝香半兩 薰陸香各一兩 雞舌香各一兩 沉香 青木香 麻

黃 防風 獨活 秦朮 葳蕤 甘草各三兩 白薇 枳實各二兩 右十三味咀以水九升煮取三升分

三服覆取汗後外摩防己膏

〔衍義〕至真要大論云諸氣臞鬱皆屬於肺故用麻黃外開肺氣佐以防風獨活秦朮風藥風能勝濕也諸

濕腫滿皆屬於脾故用枳實內泄脾氣佐以葳蕤白薇甘草氣藥氣能泄滿也經脈壅滯非香藥不能開通
五香諸藥專通經絡諸竅也服後覆汗以開鬼門平治權衡之道不外乎此若偏著脚脛腫大不赤不痛更
摩防己膏取其辛寒開通濕熱之氣庶免不遂之虞

治傷寒三日外與前藥不瘥脈勢仍數者陽氣猶在經絡未入臟腑方 桂枝 黃芩 甘草各一兩 升麻 葛

根 生薑各三兩 芍藥六兩 石膏八兩 梔子三七枚 右九味咬咀以水九升煮取二升七合分三服相去十里

久若前兩服訖即得汗後服即停不得汗更進一服得汗即止不得汗者明日去梔子加麻黃二兩足水二
升再依方服

〔衍義〕傷寒身發浮腫服五香麻黃脈數不除陽邪猶在經絡故於桂枝湯中除去大棗之滯膈加升麻葛
根以透表石膏梔子以化熱黃芩專散在表之標熱也倘服之不應更進一服仍不得汗恐升葛桂枝力綿
不能勝芩梔石膏之過涼於中裁去梔子易入麻黃便合大料桂枝二越婢一湯之法以服前藥身腫尙未
全瘥故大棗終非所宜升葛尙不可缺也

雪煎 治傷寒方 麻黃十斤 大黃一斤十二兩 杏仁三斗 右三味咬咀以雪水五斛三斗潰麻黃於東向竈

釜中三宿內大黃攪令調炊以桑薪煮得二斛汁去滓復內大黃搗杏仁內汁中復炊之可餘六七斗汁絞
去滓置銅器中又以雪水三斗合煎之攪令調得一斗四升藥成可丸冷凝丸如彈丸有病者以三沸白湯

五合研一丸入湯中適寒温之立汗出若不愈者復服一丸密盛藥勿令泄氣

〔衍義〕雪煎方中大料麻黃杏仁雖有些微大黃必從麻杏走表然後緩通餘熱方下雖治傷寒總是西北氣厚合成丸劑四時常用疎泄客邪之藥終非南陽湯液隨證進退正治法也

發汗丸第六方二首

神丹丸 治傷寒脈澀惡寒發熱體疼者方 附子 烏頭各四兩 人參 茯苓 半夏各五兩 硃砂一兩 右六

味末之蜜丸以真丹為色先食服如大豆二丸生薑湯下日三須與進熱粥二升許重覆汗出止若不得汗

汗少不解復服如前法若得汗足應解而不解者當服桂枝湯此藥多毒熱者令飲水寒者温飲解之治瘧

先發服二丸 要略用細辛不用人參名赤丸主寒氣厥逆

〔衍義〕神丹丸本金匱赤丸彼治寒氣厥逆故用茯苓半夏烏頭細辛礬石專取相反激其破陰逐邪之功

此治傷寒脈澀惡寒發熱體痛而用烏附參附半夏當矣乃反去細辛之温散取用硃砂之鎮邪殊不可解

洗心求之方知此方既有烏附之辛烈則細辛正可無用雖硃砂之重著諒不能阻礙烏附破陰之力所以

並行而不相悖也 前方服六物青散得汗不解用神丹丸方中烏附雖同安得如此方相反互激之力歟

麥奴丸 治傷寒五六日以上不解熱在胸中口噤不能言惟欲飲水為壞傷寒醫所不能治為成死人精魂

已竭心下纔温以杖發其口開灌藥咽中藥得下即愈麥奴丸一曰墨奴丸二曰水解丸 釜底墨 竈突

墨 梁上塵 麥奴 黃芩 大黃 芒硝各一兩 麻黃二兩 右八味末之蜜丸如彈子大以新汲水五合

研一丸破漬置水中當藥消盡服之病者渴欲水極意不問升數欲止復強飲能多飲為善不欲飲水當強

飲服藥須臾當寒寒竟汗出便解若服藥日移五尺許不汗復服如前法不過再三服佳小麥黑勃名麥奴

〔衍義〕麥奴丸方下雖治傷寒而實時氣的方方中釜底墨竈突墨梁上塵皆取溫散火毒麥奴乃濕熱間

氣所鍾取治溫毒為同氣之嚮導麻黃黃芩以散在表之熱大黃芒硝以泄在裏之毒也若渴欲飲水極意

與之飲後惡寒汗出便解故又名水解丸

宜吐第七例一首 方二首

例曰大法春宜吐凡服吐藥中病便止不必盡劑也 病如桂枝證頭不痛項不强而脈寸口浮胸中鞭滿氣

上衝喉咽不得息者此以內有久痰宜吐之 病胸上諸寒胸中鬱鬱而痛不能食欲得使人按之反有涎出

不利日十餘行而其人脈遲寸脈微滑者此宜吐之吐之利即止 少陰病飲食入口即吐心中愠愠然欲吐

復不能吐者宜吐之宿食在上腕宜吐之 病手足逆冷脈乍結者客氣在胸中心下滿而煩飢不能食者以

病在胸中宜吐之

瓜蒂散 病如桂枝證頭不痛項不强寸脈微浮胸中痞堅氣上冲咽喉不得息者此為胸有寒也宜吐之方

瓜蒂 赤小豆各一兩 右二味治下篩取一錢七香豉一合熟湯七合煮作稀粥去滓取汁和散溫頓服之

不吐者少加得快吐乃止

張文仲以白湯三合和服

〔衍義〕瓜蒂散治病如桂枝證言時如畏寒而無頭痛項強表證但心下痞堅乃胸中寒寒者濁濕鍾聚陽和不能敷布或時兀兀欲吐也故與瓜蒂之苦寒以吐胸中寒實兼赤小豆之甘酸以清利心包餘熱所謂酸苦涌泄為陰也

水道散 治時氣病煩熱如火狂言妄語欲走方 甘遂半兩 白芷二兩 大黃四兩 厚朴八兩 枳實五枚 芒硝

三合 右六味㕮咀以水一斗先煮厚朴枳實取五升去滓內大黃煎取二升去滓下芒硝更煎一兩沸分再服得快利止

〔衍義〕大陷胸大承氣二方合用兼攻胸腹之結加白芷以解風熱內蘊之血閉也

宜下第八方八首

大承氣湯 治正陽陽明病潮熱不大便六七日短氣腹滿而喘手足濇然汗出方 大黃四兩 厚朴半斤 枳

實五枚 芒硝三合 右四味㕮咀以水一斗先煮二物取五升去滓內大黃煮取二升去滓內芒硝更土微

火一二沸分溫再服得下餘勿服

〔衍義〕承氣者熱邪內結陽明之府用以下泄逆上之氣氣有餘便是火亢則害承乃制也夫火非苦寒不降故用大黃氣非辛溫不散故用厚朴滿非辛苦不泄故用枳實熱非鹹寒不除故用芒硝然泄滿蕩熱正

當峻用苦寒而反倍用厚朴入於苦寒劑中乃得逆從相需之妙若太陽陽明離太陽未遠所以調胃承氣不用枳實厚朴而兼甘草緩行祛熱之力少陽陽明則去正陽而逼太陰其邪已非大實所以除去芒硝僅用厚朴二兩以爲從治之使味耳

抵當丸

下血方

水蛭

蠱蟲

各二枚

桃仁

二十枚

大黃

三兩

右四味爲末蜜和合分爲四丸以水一升煮一

丸取七合頓服之暍時當下血不下更服

抵當湯

治同前

水蛭

蠱蟲

各三枚

桃仁

二十枚

大黃

三兩

右四味咬咀以水五升煮取三升去滓服一升

不下更服

〔衍義〕抵當湯丸南陽本治下焦結血故取蠱蟲水蛭噉血之品以破瘀積兼桃仁大黃開泄下行之路也

承氣湯方

枳實

五枚

芒硝

半斤

大黃

四兩

甘草

二兩

右四味咬咀以水五升煮取二升去滓適寒溫分三

服如人行五里進一服取下利爲度若不得利盡服之

〔衍義〕變大承氣爲調胃承氣專取甘草通調之力以緩硝黃之急也更加枳實於調胃承氣方中校大承

氣中厚朴雖辛溫辛苦不同而泄滿之功則一

生地黃湯

治傷寒有熱虛羸少氣心下滿胃中有宿食大便秘不利方

生地黃三斤大黃四兩甘草二寸芒

硝二合

大棗

二十枚

右五味合搗令相得煮五升米下熟絞取汁分再服

〔衍義〕又於調胃承氣方中加生地黃以滋血兼取大棗以行脾氣而散心腹之邪也

大柴胡蕤知母湯 治傷寒七八日不解默默心煩腹中有乾屎讖語方 柴胡半斤 蕤 知母 大

黃 甘草各二兩 人參 黃芩 芍藥各三兩 生薑五兩半夏半升 右十味咬咀以水一斗煮取三升去滓服

一升日三卽下為效集驗用枳實四枚不用芍藥

〔衍義〕少陽為樞乃陰陽之交界表裏駸駸內犯舍小柴胡別無主治小柴胡中非藉人參壯其胃氣不能

把守其樞若心下急鬱鬱微煩則邪已內入雖用人參徒資助虛故去人參甘草加枳實以導

滯大黃以泄滿芍藥以收陰共振蕩滌之威此兼大小柴胡於中但去大棗更加蕤知母二味不但滋化

風熱并佐枳實大黃下行之力也 按此雖名大柴胡仍不去人參甘草以病人津氣本燥故加蕤知母

則人參甘草又為必需近見時師用小柴胡未有一人不去人參者何怪病邪傳陰入府變證多端也

治傷寒頭痛壯熱百節疼痛方 柴胡 梔子仁 芍藥 知母各四兩 升麻 黃芩 大青 杏仁各三兩 石膏

八兩香豉一升 右十味咬咀以水九升煮取二升七分溫三服若熱盛加大黃四兩

〔衍義〕此方所治之證雖傳少陽而頭痛壯熱未除知尚未離陽明之界故用柴胡升麻兼治二經之邪香

鼓山梔專解膈上之煩黃芩杏仁以泄逆上之滿石膏知母化胃中之火大青芍藥以清營血之熱若熱甚

加大黃仍借大柴胡變通之法

馱鼓丸 治傷寒留飲宿食不消方 鼓一升杏仁六十枚黃芩 黃連 大黃 麻黃各四兩芒硝 甘遂各三兩

巴豆去油二百枚 右九味為末以蜜和丸如大豆服二丸不得下者增之崔氏云此黃素方

〔衍義〕千金本黃素方以治傷寒留飲宿食大施轉日回天神手伊尹三黃古稱湯液之祖從此採出以蕩

滌中外熱毒香豉麻杏開金止沸巴豆硝黃撥火散焚非黃素不能設立非千金不能體用 服度瘴發汗

青散得汗不解內實不除之故故宜服此內外兼攻并納鼻孔專藉巴豆香豉發諸藥之性也

發汗吐下後第九脈證七百 灸法一首 方十七首

傷寒已解半日許復心煩熱其脈浮數者可更發汗宜桂枝湯凡發汗後飲水者必喘宜慎也

竹葉湯 治發汗後表裏虛煩不可攻者但當與此方 竹葉一把半夏半斤麥冬一升人參 甘草各二兩生

薑四兩石膏一升 右七味㕮咀以水一斗煮取六升去滓內粳米半升米熟去之分服一升日三張文仲不用生

薑

〔衍義〕此卽竹葉石膏湯方中一派化熱生津除煩止渴之藥但以半夏一味滌除痰飲則肺胃清寧千金

加入生薑以助半夏開豁之力世言半夏辛燥煩渴非其所宜因小青龍湯後有服湯已渴者寒去欲解之

語不知痰去則氣通火升覺渴不過暫時少頃津回氣潤煩渴自除先哲復有服二陳湯能使大便潤而小

便長痰去則津液流通之明驗也

桂枝麻黃湯 服桂枝湯大汗後脈洪大者與桂枝湯若形如瘧一日再發汗出便解者屬桂枝二麻黃一湯

方 桂枝一兩十枚 麻黃十六枚 芍藥 生薑各一兩六銖 甘草一兩 杏仁十六枚 大棗五枚 右七味㕮咀以水五升

煮麻黃再沸去沫內諸藥煮取二升適寒溫分再服取微汗而已

〔衍義〕桂枝麻黃二湯分治風寒營衛之證此以汗下不解面赤身癢知爲汗出不徹當有小汗伏於經中故宜桂枝麻黃各半分解兩經聯繫之邪方爲合法 若服桂枝湯邪當解矣服後大汗出脈反洪大此必營衛俱傷但以風多寒少有似乎桂枝證故但治風而不及寒遺其邪於經中且汗出經虛不能禦邪之向裏裏不服邪所以形如瘧日再發邪雖勢衰終爲微寒所持故與桂枝二麻黃一湯略兼治寒得小汗出則愈矣 若發熱惡寒熱多寒少脈微弱者此無陽也不可誤發其汗蓋熱多則陰受傷之明驗無陽乃無津液之通稱津爲陽血爲陰不可以無陽謬誤陽虛反用石膏致惑

小青龍湯 治傷寒表未解心下有水氣乾嘔發熱而咳或渴或利或噎或小便不利小腹滿或喘者方 桂

心 麻黃 甘草 乾薑 芍藥 細辛各三兩 五味子 半夏各半 右八味㕮咀以水一斗煮麻黃減二

升去上沫內諸藥煮取三升分三服相去十里許復服之若渴者去半夏加栝蘆根三兩若微利去麻黃加

芫花如一雞子大熬令赤色若噎加附子一枚若小便利小腹滿者去麻黃加茯苓四兩若喘去麻黃加

杏仁半升數用神效

〔衍義〕見前大青龍湯下

四物甘草湯 治傷寒發汗出而喘無大熱與此方 甘草二兩麻黃四兩石膏半斤杏仁五十枚 右四味咬

咀以水七升先煮麻黃去沫令減二升內諸藥煎取三升分三服

〔衍義〕傷寒論原名麻黃杏仁甘草石膏湯金匱名麻杏甘石湯本治太陽寒傷營證因誤用桂枝固衛而

見喘滿既經汗下邪從藥泄故無大熱仍取麻黃開發於外杏仁疎泄於上石膏清解於內甘草調和臟腑

寒熱之邪名曰四物甘草湯專賴平調中氣之義

梔子湯 治發汗若下後頓熱胸中窒氣逆搶心者方 梔子十四枚香豉四合 右二味以水四升先煮梔子

服二升半次內豉煮取一升半分二服溫進一服得快吐止後服

〔衍義〕此卽梔子豉湯本治發汗吐下後虛煩懊懣梔子專散胸中客熱香豉專主太陽經中不正之氣

厚朴湯 治發汗後腹脹滿方 厚朴半兩人參一兩甘草二兩生薑八兩半夏半升 右五味咬咀以水一

斗煮取三升分三服

〔衍義〕傷寒論原名厚朴生薑甘草半夏人參湯本桂枝證誤用麻黃發汗濁陰之邪乘虛入裏而致喘滿

與瀉心湯證似同而實小異濁氣填滿故首取厚朴以泄氣滯薑半以破痰結參草以助清陽清陽運動而

濁陰自除本非結胸之寒熱互結故無藉於乾薑芩連大棗也

元武湯 治太陽病發汗汗出不解其人仍發熱心下悸頭眩身動振振欲擗地方 茯苓 芍藥 生薑

各三兩 白朮二兩 附子一枚 右五味咬咀以水八升煮取二升溫服七合

〔衍義〕真武湯治太陽證過汗經虛致邪內陷迫其虛陽外擾而為發熱上逆而為頭眩內薄而為心悸經

虛而為暈動身不自主振振欲擗地而入若無容之狀也急需朮附以安水土二臟庶得統攝周身之經脈

而暈振向安茯苓降泄胸脇逆氣而心悸可止芍藥收斂虛陽而頭眩自除生薑發越陽氣招徠虛熱歸輔

朮附無復外擾之患矣以證變之驟所以甘草大棗甘緩之味無預於治也

葛根黃連湯 治太陽病反下之利遂不止脈促者表未解喘而汗出者方 葛根半斤 黃連 黃芩 各三兩 甘

草二兩 右四味咬咀以水八升先煮葛根減二升次內諸藥煮取二升去滓分再服

〔衍義〕傷寒論原名葛根黃芩黃連湯本治誤下利不止脈促喘汗之證以葛根解表芩連清內甘草和中

兼和藥性之寒熱并治溫病熱病之太陽陽明合病若合符節

茯苓湯 治傷寒發汗吐下後心下逆滿氣上衝胸起即頭眩其脈沉緊發汗則動經身為振振搖者方 茯

苓四兩 白朮 各三兩 桂心 甘草二兩 右四味咬咀以水六升煮取三升去滓分三服

〔衍義〕傷寒金匱原名茯苓桂枝白朮甘草湯本治太陽風傷衛證緣誤施汗下邪欲犯裏裏不服邪所以

氣上衝胸邪竊內據運動其飲所以起即頭眩水精不上注於目所以目眩故以桂枝加入制飲藥內通陽

氣開經絡白朮治痰水除脹滿然中滿不食反用甘草何也蓋桂之辛散得甘草和其寒熱使不僭上甘草得茯苓則不支滿而反燥利且能下氣除滿也 金匱用此以治心下痰飲胸脅支滿目眩專取桂苓通利小便朮甘培護中氣以振運痰利水之力耳

凡寸口脈浮關上自沉為結胸巢源作沉細

凡傷寒病發於陽而反下之熱入因作結胸

大陷胸丸 治結胸病項亦強如柔痙狀下之即和方 大黃八兩 芒硝 杏仁熬薤白各五兩 右四味搗篩

大黃葶藶餘二味別研如脂和散取如彈丸大一枚甘遂末一錢七白蜜二合水一升煮取八合溫頓服之

病乃自下如不下更服取下為效

傷寒六七日結胸熱實其脈沉緊心下痛按之正堅宜大陷胸湯

太陽病重發汗而復下之不大便五六日舌上乾而渴日晡小有潮熱心胸大煩從心下至小腹堅滿而痛不

可近其方如下

大陷胸湯 甘遂末一錢七 大黃切六兩 芒硝 一升 右三味以水六升先煮大黃取三升去滓次內芒硝一沸次內

甘遂分再服一服得快利止後服

〔衍義〕結胸而至項強證已篤矣蓋胸中邪結緊實項勢常昂有似柔痙之狀然歷則身首俱張此但項強

原非瘧也但此以驗胸中之邪十分緊迫以大陷胸湯下之恐過而不留卽以大陷胸丸下之又恐滯而不
行故煮而連滓服之始得與邪相當方中大黃芒硝甘遂可謂峻矣更加葶藶杏仁以射肺邪而上行其急
又須熬黑以滌其垢煮時倍加白蜜以留戀潤導之而下胥其緩深得長沙之奧千金一人而已 其大陷
胸湯治太陽病重發汗而復下之不大便而燥渴日晡潮熱小腹硬滿證與陽明頗同但小有潮熱不似陽
明之壯熱從心下至小腹堅不可近則陽明又不似此大痛因是以辨爲太陽結胸而兼陽明內實也緣屢
經誤治重傷津液不大便而燥渴潮熱更加痰飲內結必須用陷胸湯由胸脇以及腸胃一舉而蕩滌無餘
若但下腸胃結熱反遺膈上痰飲則非法矣設心下結而不鞭按之則痛脈微滑者乃痰飲挾熱內結爲小
結胸證則宜黃連半夏栝實三物小陷胸湯原無實邪固結不須峻攻也至若結胸證脈浮大者爲邪尙
在表不可下下之死結胸證悉具煩躁者爲胃氣之絕亦死結胸危證死生反掌千金僅舉長沙二方不輕
增損一味心心相印於此足徵

生薑瀉心湯 治傷寒發汗後胃中不和心下痞堅乾噯食臭脅下有水氣腹中雷鳴下痢者方 生薑四兩

甘草 人參 黃芩 各二兩 乾薑 黃連 各一兩 半夏 半升 大棗 十二枚 右八味咬咀以水一斗煮取六升去滓

分服一升日三

甘草瀉心湯 治傷寒中風醫反下之其人下痢日數十行穀不化腹中雷鳴心下痞堅結滿乾嘔心煩不能

得安師見心下痞謂病不盡復下之其痞益甚此非結熱但以胃中虛客氣上逆使之然也宜治之方甘
草四兩黃芩 乾薑各二兩黃連一兩半夏半升大棗十二枚右六味㕮咀以水一斗煮取六升去滓分服一

升日三

〔衍義〕汗後外邪雖解然必胃氣安和始得脫然無恙胃主津液津液因邪入而內結因發汗而外入兩相
告匱其人心下痞鞭以伏飲搏聚胃氣不足以開之胃病故乾噎食臭水入而傍滲脅下也胃中水穀不行
腹中雷鳴有聲下利而清濁不分也雖不誤下而且成痞設誤下之其痞結又當何如耶 後條傷寒中風
互言可見病發於陰下之成痞者非指傷寒爲陰也下後完穀腹鳴嘔煩皆誤下而胃中空虛之互辭不知
此以爲熱結而復下之其痞必益甚故重以胃中空虛客氣上逆照揭病因方用甘草瀉心湯卽前生薑瀉
心湯除去生薑人參而倍甘草乾薑也客邪乘虛結於心下本當用人參以誤而再誤其痞已極人參和柔
無剛決之力故去而不用生薑辛溫最宜用者然以氣薄主散恐領津液上升客邪從之犯上故倍用乾薑
代之以開痞而用甘草爲君坐鎮中州庶心下腹中漸致寧泰耳今人但知生薑代乾薑孰知以乾薑代生
薑之散哉但知甘草能增滿孰知甘草能去滿哉 其傷寒五六日嘔而發熱下之心下但滿而不痛者宜
半夏瀉心湯卽生薑瀉心湯除去生薑之走表藉半夏以溫膽以證起於嘔故推半夏爲君主卽心實熱下
利水穀不消腹中雷鳴心下痞滿乾嘔不安亦不出此 痞證脈緊卽不可下誤下而邪反入裏寒邪轉入

轉深外邪與飲搏結故心下滿鞭濁氣蘊熱上逆惟大黃黃連瀉心湯苦寒瀉之 若惡寒汗出雖有濕熱痞聚於心下而挾陰虛陰盛之證故於大黃黃連瀉心湯內另煎附子汁和服以各行其力共成傾痞之功卽一瀉心湯方中法度森森若此千金於結胸痞證各舉二方爲例餘俟學人之自悟可也 并治溫毒變爲狐惑蟲食於上聲喝及下痢不止腹中幅堅嘔噦腸鳴此方並可主治總皆火毒之患耳

白虎湯

治傷寒吐下後七八日不解結熱在裏表裏俱熱時惡風大渴舌上乾燥而煩欲飲水數升者方

石膏

一升知母六兩甘草二兩粳米六合

右四味咬咀以水一斗煮米熟去滓分服一升日三諸亡血及

虛家不可與白虎湯若立夏後至立秋前得用之立秋後不可服春三月尙凜冷亦不可與之與之則嘔利腹痛

傷寒無大熱而口乾渴心煩背微惡寒宜服白虎湯

傷寒脈浮發熱無汗其表不解不可與白虎湯 渴欲

飲水無表證宜白虎湯

若渴欲飲水口燥舌乾者亦宜白虎湯

〔衍義〕傷寒論此條主以白虎加人參湯詳本文熱結在裏表裏俱熱二句已自酌量惟熱在裏所以表熱

不除邪火內伏所以惡風大渴舌燥而煩欲飲水不止安得不以白虎湯化熱爲務卽於方中加人參生津

爲急耶千金慮熱毒勢盛恐加人參助長邪氣未便輕用所以方後垂戒諸亡血虛家及立秋後春三月皆

不可與與之則嘔利腹痛惟夏至後立秋前得用之按白虎金神夏暑過之而退爲熱病暑病之的方向長

沙白虎例首謂之傷寒當知古聖藏機妙用全在乎此欲人深求而自得也蓋熱病乃冬不藏精陽氣發泄復傷驟寒致邪氣伏藏骨髓至夏大汗出而熱始發故仍以傷寒目之以伏邪從骨髓發出由心包而薄陽明處方乃以石膏救陽明之熱知母淨少陰之源甘草化心包之火粳米護肺胃之津氣弱者必加人參則本方方始得力後人不審每以白虎湯治冬月傷寒發熱未有僥倖得免者今特昭揭此義以爲冬月擅用白虎之戒觀溫瘧用桂枝白虎濕溫用蒼朮白虎皆春夏應用之方非秋冬藥也 又傷寒無大熱而口燥渴心煩背微惡寒者宜白虎湯此言熱毒內盛而煩表不勝邪而寒也 傷寒脈浮發熱無汗其表不解不可與白虎湯渴欲飲水無表證宜白虎湯此辨暴感之邪而非伏氣之發故不可與若渴欲飲水但顯伏熱外無表證方爲合宜若渴欲飲水口乾舌燥者亦宜白虎湯此雖長沙本例千金入此卽是上條渴欲飲水無表證之註脚也上三條傷寒論本文並用白虎加人參湯義見前方條下 其有傷寒脈浮滑此表有寒裏有熱白虎湯主之一條詳脈浮滑明係伏邪初乘肌表之應以表虛不能勝邪其外反顯假寒故言表有寒伏邪始發未盡裏熱猶盛故言裏有熱與傷寒脈滑而厥裏有熱一條參看自明因世本誤刊表有熱裏有寒千金不解其故故不錄入 復有三陽合病腹滿身重難以轉側口不仁而面垢讞語遺尿發汗則讞語下之額上汗出手足逆冷若自汗出者白虎湯主之一條是言熱病而兼中膈乘勢一齊發出之證而非傷寒三陽合病故亦不錄 更有服桂枝湯大汗出後大煩渴不解脈洪大者白虎加人參湯一條此熱病

誤認太陽中風而與桂枝湯乃挽回誤治之法非本病方故亦不錄

青葙子丸 治傷寒後結熱在內煩渴者方 青葙子五兩黃芩 栝蘘根 苦參各一兩黃柏二兩龍膽 梔

子仁 黃連各三兩 右八味為末蜜丸如梧子大先食服七丸不知稍加一本云錫和為丸

〔衍義〕青葙子專走厥陰肝經本經治唇口青是熱伏至陰而見假象非陰寒藥也草龍膽本經治骨間寒

熱大瀉肝經濕熱苦參本經治心腹結氣與黃柏同為瀉腎之品兼芩連梔子一派苦寒暗伏黃連解毒於

中更加栝蘘根通津液除煩渴相率以迅掃留泊之餘邪咸非馴良之品病人稍涉虛者難以概施

大青湯 治傷寒熱病十日已上發汗不解及吐下後諸熱不除及下痢不止斑出皆治之方 大青四兩甘

草 阿膠各二兩 豆豉一升 右四味啜咀以水八升煮取三升去滓煮三沸去豉內阿膠令烊頓服一升日

三服欲盡復作常使有餘渴者當飲但除熱止吐下無服深師治勞復肘後有赤石脂三兩胡治集驗同

〔衍義〕大青乃藍之一種善解陷伏至陰之邪豆豉專搜少陰不正之氣阿膠滋血潤燥甘草解毒和中不

特為陽毒發斑之專藥一切時行溫熱汗吐不解下利不止並得用之取其解散陰經熱毒也

治傷寒後不了了朝夕有潮熱如瘧狀方 知母二兩麻黃 甘草 芍藥 黃芩 桂心各一兩 右六味啜

咀以水七升煮取二升半服五合日三溫覆令微汗若心煩不得眠其人欲飲水當稍稍飲之令胃中和則

愈

〔衍義〕此於金匱桂枝芍藥知母湯中除去朮附風生薑四味易入黃芩一味彼用朮附以開下著之痹麻知以散上盛之熱此用麻知以解宿蘊之邪桂芍以和將復之血散邪杜火全在麻知二味之力

灸法

初得病或先頭痛身寒熱或漉漉欲守火或腰背強直面目如飲酒狀此傷寒初得一二日但烈火灸心下三處第一處去心下一寸名巨闕第二處去心下二寸名上脘第三處去心下三寸名胃脘各灸五十壯然或人形大小不同恐寸數有異可繩隨度其長短寸數最佳取繩從心頭骨名鳩尾頭度取臍孔中屈繩取半當繩頭名胃脘又中屈半繩更分爲二分從胃脘向上度一分卽是上脘又上度取一分卽是巨闕大人可灸五十壯小兒可三壯亦隨其年灸之大小以意斟酌量也若病者三四日以上宜先灸胸上二十壯以繩度鼻正上盡髮際中屈繩斷去半便從髮際入髮中灸繩頭名曰天聽又灸兩顛顛又灸兩風池又灸肝膈百壯餘處各一十壯又灸大衝三十壯神驗

孫真人備急千金要方卷十

長洲張 璐路玉衍義

南沙席 世臣郢客校

傷寒方下 凡七類

傷寒雜治第十 論一首 方五十一首 灸法一首

論曰凡除熱解毒無過苦酢等物故多用苦參青箱艾梔子葶藶苦酒烏梅之屬是其要也夫熱盛非苦酢之物不解也熱在身中既不時治治之又不用苦酢等藥此如救火不以水也必不可得脫免也又曰今諸療多用辛甘薑桂人參之屬此皆貴價難得常有比行求之轉以失時而苦參葶藶青箱艾之屬所在盡有除熱解毒最良勝於向之貴價藥也前後數參並用之得病內熱者不必按藥次也便以青箱苦參艾苦酒療之但稍與促其間無不解也○扁鵲曰病在腠理湯熨之所及病在血脈鍼石之所及病在骨髓無可奈何而凡醫治病或言且待使病成乃頓去之此為妄矣當預約束家中及所部曲具語解此意使有病者知之為要

治溫氣病欲死方 苦參一兩以酒二升煮取一升盡飲之當吐則除諸毒病服之覆取汗皆愈 張文仲及時後云治熱毒

垂死破棺 千金湯

苦參湯 治熱病五六日已上方 苦參三兩 黃芩二兩 生地黃八兩 右三味咬咀以水八升煎取二升適

寒溫服一升日再

附張路玉先生衍義

〔衍義〕傷寒溫病截然兩途凡醫但見壯熱頭疼槩行發散信手殺人曷知溫病是久伏少陰之邪得春時溫暖之氣蘊化濕熱從內發外故用苦參搜逐腎家久伏之邪取其苦燥濕寒除熱借酒引之上涌吐中便具發散之義 若五六日後熱交營分徹外壯熱即加生地以清血脈之邪黃芩以泄肌膚之熱較之初發淺深不同又非一味苦參可治也

凝雪湯 治時行毒病七八日熱積聚胸中煩亂欲死起死人湯方 芫花一升以水三升煮取一升半漬故布薄胸上不過三薄熱即除當溫暖四肢護厥逆也

〔衍義〕芫花消痰飲水腫之專藥本經治咳逆上氣喉鳴咽腫千金取治時行毒病用水煎漬布取以攻發濕熱之毒也

栝萸湯 治傷寒中風五六日已上但胸中煩乾嘔方 栝萸實一枚黃芩甘草各三兩生薑四兩大棗十二枚

柴胡八兩 右六味咬咀以水一斗二升煮取五升絞去滓適寒溫服一升日二

〔衍義〕於小柴胡方中除去半夏人參加入栝萸治少陽乾嘔煩渴

蘆根飲子 治傷寒後嘔噦反胃及乾嘔不下食方 生蘆根切青竹茹各一升生薑三兩粳米三合右四味

以水七升先煮千里鞋底一隻取五升澄清下藥煮取二升半隨便飲不瘥重作取瘥

治傷寒後嘔噦方 通草三兩生蘆根切橘皮一兩粳米三合右四味咬咀以水五升煮取二升隨便稍

飲不瘥更作取瘥止

〔衍義〕金匱治胃熱噦逆乾嘔無如橘皮竹茹生薑等味千金乃於橘皮竹茹湯中採取竹茹生薑清理胃中痰逆配入蘆根滌除胃熱粳米以安胃氣也 次方但採橘皮順氣滌痰參入通草上通陽明逆氣使之下通仍賴蘆根粳米滌熱安中之力

治傷寒後虛羸少氣嘔吐方 石膏 麥冬 半夏各一升 竹葉一把 人參一兩 右五味咀咀以水一斗煮取六

升去滓內粳米一升米熟湯成飲一升日三服一方加生薑五兩此方是仲景竹葉湯方前卷汗後門中已有但少甘草分兩小別

〔衍義〕即前竹葉湯去甘草衍義見前

治熱毒攻手足赤腫焮熱疼痛欲脫方 煮馬屎與羊屎汁漬之日三度

又方 濃煮虎杖根適寒溫以漬手足令至踝上一尺止○又方 稻糞灰汁漬之○又方 取好酒煮苦參

漬之○又方 猪膏和羊屎塗之亦佳○又方 取常思草絞取汁漬之一名蒼耳

〔衍義〕手足赤腫熱攻四末故以四足獸屎汁漬之散邪毒和血脈也 虎杖性善通利煮汁漬手足亦取

破血利水之功 稻糞灰汁專於滌垢亦能散血 酒煮苦參服之專祛溫毒漬之亦能解熱 猪膏和羊

屎塗熱腫痛處即前馬羊屎汁漬之變法 蒼耳治四肢拘攣脚膝疼痛以其能去風濕毒邪也

漏蘆連翹湯 治時行熱毒變作赤色癰疽丹疹熱毒赤腫及眼赤痛生障翳方 漏蘆 連翹 黃芩 麻

黃白蘗 升麻 甘草各二兩 枳實 大黃各三兩 右九味峻咀以水九升煮取三升分三服相去如人行五里久更服熱盛者可加芒硝二兩

〔衍義〕時行熱毒雖熾發於外而毒尙根於內故用麻黃升麻開泄既發之毒枳實大黃攻逐未盡之邪麻黃升麻得漏蘆連翹黃芩利竅解毒清熱之品則無助虐熾腫之虞枳實大黃得白蘗甘草攝津禦毒之味則有匡正辟邪之勛其配合之奧未許拘執藥性者之妄行推測也

猪膽湯 治傷寒五六日斑出方 猪膽 苦酒各三合 雞子一枚 右三味合煎三沸強者盡服之羸者須煎

六七沸分爲二服汗出卽愈

〔衍義〕發斑而用猪膽苦酒雞子必陽毒陷於陰分而見咽痛之故若邪在陽分正當助其熾發必無酸收之理方中猪膽瀉肝火苦酒收陰氣雞子潤咽痛服之使嘔鼓毒發於陽分汗出則愈乃長沙少陰例中苦酒湯之變法以補長沙之未逮

治人及六畜時氣熱病豌豆瘡方 濃煮黍穰汁洗之一莖是穠穰卽不瘡瘡若黑者搗蒜封之○又方煮葶藶洗之

治熱病後發豌豆瘡方 黃連三兩以水二升煮取八合頓服之○又方 眞波斯青黛大如粟水服之瘡○又方 青木香二兩以水三升煮取一升頓服之愈○又方 小豆末雞子白和傅之

滓分溫再服其脈卽出者愈面赤者加葱白九莖腹痛者去葱加芍藥二兩嘔者加生薑二兩咽痛者去芍藥加桔梗一兩利止脈不出者去桔梗加人參二兩病皆與方相應者乃加減服之

少陰病四逆其人或欬或悸或小便不利或腹中痛或洩利下重四逆散主之方 甘草炙 枳實炙 柴胡

芍藥各十分

右四味搗爲散白飲和服方寸七日三服欬者加五味子乾薑各五分兼主利悸者加桂五

分小便不利者加茯苓五分腹中痛者加附子一枚炮洩利下重者先以水五升煮薤白三升取三升去滓以散三方寸匕內湯中煮取一升半分溫再服

少陰病不利六七日欬而嘔渴心煩不得眠猪苓湯主之方見陽明門 少陰病得之二三日口燥咽乾急下之宜

承氣湯 少陰病利清水色青者心下必痛口乾燥者可下之宜承氣湯一云大柴胡 少陰病六七日腹滿不大

便者急下之宜承氣湯方見承氣中 少陰病其脈沉者當溫之宜四逆湯 少陰病其人飲食入則吐心中溫溫

欲吐復不能吐始得之手足寒脈弦遲此胸中實不可下也當遂吐之若膈上有寒飲乾嘔者不可吐當溫之

宜四逆湯方見陽明門 少陰病下利脈微澀者卽嘔汗者必數更衣反少當溫其上灸之一云灸厥陰五十壯

厥陰病狀第三五十陸證方七首

厥陰之爲病消渴氣上衝心中疼熱飢而不欲食甚者則欲吐虻下之不肯止 厥陰中風其脈微浮爲欲愈

不浮爲未愈 厥陰病欲解時從丑盡卯 厥陰病渴欲飲水者與水飲之卽愈 諸四逆厥者不可下之虛

家亦然 傷寒先厥後發熱而利者必止見厥復利 傷寒始發熱六日厥反九日而下利厥利當不能食今

反能食恐為除中食之黍餅不發熱者知胃氣尚在必愈恐暴熱來出而復去也後三日脈之數其熱續在期

之旦日夜半愈所以然者本發熱六日厥反九日復發熱三日并前六日亦為九日與厥相應故期之旦日夜

半愈後三日脈之數其熱不罷此為熱氣有餘必發癰膿 傷寒脈遲六七日而反與黃芩湯徹其熱脈遲為

寒與黃芩湯復除其熱腹中冷當不能食今反能食此為除中必死 傷寒先厥發熱下利必自止而反汗出

咽中強痛其喉為痹發熱無汗而利必自止便膿血便膿血者其喉不痺 傷寒一二日至四五日厥者必發

熱前厥者後必熱厥深熱亦深厥微熱亦微厥應下之而發其汗者口傷爛赤 凡厥者陰陽氣不相順接便

為厥厥者手足逆者是 傷寒病厥五日熱亦五日設六日當復厥不厥者自愈厥不過五日以熱五日故知

自愈 傷寒脈微而厥至七八日膚冷其人躁無安時此為藏寒虵上入其膈虵厥者其人當吐虵令病者靜

而復時煩此為藏寒虵上入其膈故煩須臾復止得食而嘔又煩者虵聞食臭必出其人常自吐虵虵厥者烏

梅丸主之方又主久痢 烏梅三百枚 細辛六兩 乾薑十兩 黃連十六兩 當歸四兩 蜀椒四兩 附子六兩 桂枝六兩 人參

六兩 黃柏六兩 右拾味異擣合治之以苦酒漬烏梅一宿去核蒸之伍斗米下擣成泥和諸藥令相得曰

中與蜜杵千下丸如梧桐子大先食飲服拾丸日三服少少加至臈拾丸禁生冷滑物臭食等

傷寒熱少微厥稍頭寒噤噤不欲食煩躁數日小便利色白者熱除也得食其病為愈若厥而嘔胸脅煩滿其

〔衍義〕石膏化熱得蜜之甘以緩之

治傷寒熱病後口乾喜唾咽痛方 大棗^{二十枚}烏梅^{十枚} 右二味合搗蜜和含如杏核大咽其汁甚驗

〔衍義〕大棗甘緩得梅之酸以收之

赤石脂禹餘糧湯 傷寒服湯藥而下利不止心下痞堅服瀉心湯竟復以他藥下之利不止醫以理中與之

利益甚理中治中焦此利在下焦治之方 禹餘糧 赤石脂^{各一斤碎} 右二味以水六升煮取二升分三服

復利不止當利其小便

〔衍義〕傷寒誤下利不止心下痞堅與理中利益甚此下焦虛脫故用赤石脂禹餘糧固鎮其下則中土自

寧心下之痞自開較之桃花湯其力倍專瀦因瀦用之妙無逾於此 此方傷寒論列之甘草瀉心湯下瀦

心湯專為胃中空虛客氣上逆心下痞鞭而設若果胃中空虛與理中湯痞當開矣服之利反益甚知利不

在中焦而在下焦下焦乃腎氣所司腎虛不能固蟄封藏非甘溫不能因脫故長沙但取二味直達下焦以

取專功倘服之利復不止又當五苓利其水道以滲水實脾為務也 或心下痞鞭滿引脇下痛乾嘔短氣

汗出不惡寒此飲在脇下而痞又屬十棗湯證則與此湯無涉也

治傷寒後下利膿血方 阿膠一兩黃柏二兩黃連四兩梔子^{十四枚} 右四味咬咀以水六升煮取二升去滓

內阿膠更煎令消分為三服 甲乙方無黃柏有黃芩

〔衍義〕少陰病得之二三日以上心煩不得臥用黃連阿膠湯此治傷寒後下利膿血故於黃連阿膠湯中除去芍藥雞子黃用黃柏佐黃連以堅腸胃梔子佐阿膠以清氣血不使隨火下奔殊非舊有微瀆腎氣本虛之謂

治赤白下膿小兒得之三日皆死此有蠱蟲在下部方 麝香 礬石 巴豆 附子 真珠 雄黃等分

右六味等分治合取桑條如箭幹長三寸以綿纏頭二寸唾濡綿展取藥著綿上內穀道中半日復易之日再神效

〔衍義〕蠱本濕熱所化治用雄黃化蠱為主兼礬石收濕巴豆殺蟲麝香辟惡真珠解毒用附子者不但取其破除結積并取其烈以化下濕生蟲譬如果日當空陰類皆滅迹矣

麻黃升麻湯 治傷寒六七日其人天下後脈沉遲手足厥逆下部脈不至咽喉不利唾膿血泄利不止為難

治者方 麻黃 知母 萎蕤 亦作 薔 黃芩 各三 兩 升麻 芍藥 當歸 乾薑 石膏 茯苓 白朮 桂心

甘草 麥冬 各一兩 傷寒 論作 天門冬 右十四味呔咀以水一斗先煮麻黃減二升去上沫內諸藥煮取三升分服一

升微取汗愈

〔衍義〕傷寒六經例中惟厥陰見證最為龐雜以未離亢逆之邪又挾風木之氣所以陰中常伏陽象如麻黃升麻湯治傷寒六七日天下後脈沉遲手足厥逆下部脈不至泄利不止一一盡顯陽邪陷陰之兆其

喉不利唾膿血明係陰火僭逆之徵故借白虎湯中石膏知母甘草以化陷瀉陰中之邪麻黃升麻黃芩以泄壯火鬱蒸之焰咽喉不利滋以萎蕤門冬唾膿血和以當歸芍藥以既經大下非乾薑白朮不能收攝虛陽非桂心茯苓不能通調營氣千金體此而立萎蕤湯以治風溫總皆少陰厥陰兩經緣合之邪也設非大下後脾不委頓則桂薑白朮可以不須升麻亦可裁酌要在臨證之權衡耳

治溫毒及傷寒內虛外熱攻胃下黃赤汁及爛肉汁赤滯下伏氣腹痛諸熱毒方

梔子_{二七枚} 豉一升 薤白一

握 右三味以水四升先煮梔子薤白令熟次內豉煮取二升半分二服頓服取瘥

〔衍義〕溫毒內攻而見下利煩擾故借太陽例中梔子豉湯加薤白一味上主胸中懊懣下除泄利下重也治病後虛腫方 豉五升 醕酒一斗 右二味煮三沸及熱頓服不耐酒者隨性覆取汗

〔衍義〕脾虛不能統氣而浮散於外故用酒煮豉以滌除陳氣則氣隨汗泄而愈

治汗不止方 地黃三斤切以水一斗煮取三升分作三服○又方 白朮葉作飲飲之○又方白朮方寸七以飲服之

治卒得汗不止方 以溫酒服牛羊脂愈

治盜汗及汗無時方 以韭根四十九枚水二升煮一升頓服之爲度○又方 豉一升以酒二升漬三日服不瘥更合服不過三劑卽止

止汗方 杜仲 牡蠣等分 右二味治下篩臨夜臥以水服五錢七

牡蠣散 治臥即出盜汗風虛頭痛方 牡蠣 白朮 防風各三兩 右三味治下篩酒服方寸七日二此方

一切泄汗服之三日皆愈○又方 牡蠣 雷丸 麻黃根各三兩 乾薑 甘草各兩 米粉二升 右六味治

下篩隨汗處粉之

〔衍義〕血熱蒸汗用生地黃 脾虛汗泄用白朮散 經虛風熱自汗用酒服牛羊脂 瘀血自汗用韭根

虛陽上升用酒煮豉與前治病後虛腫無異但有覆汗不覆汗之分 腎虛不能斂津而汗用杜仲牡蠣

不應去杜仲加白朮防風祛風逐濕 溫熱用牡蠣麻黃根等味斂中寓散法也

勞復第十一 論二首 方十八首 食忌九條

論曰凡熱病新瘥及大病之後食猪肉及羊血肥魚油膩等必當大下利醫所不能治也必至於死若食餅餌
粢黍飴哺餒炙棗栗諸果物脯脩及堅實難消之物胃氣尚虛弱不能消化必更結熱適以藥下之則胃氣虛
冷大利難禁不下之必死下之復危皆難救也熱病及大病之後多坐此死不可不慎也○病新瘥後但得食
糜粥甯少食令飢慎勿飽不得他有所食雖思之勿與之也引日轉久可漸食羊肉白糜若羹汁雉兔鹿肉不
可食猪肉也新瘥後當靜臥慎勿早起梳頭洗面非但體勞亦不可多言語用心使意勞煩凡此皆令人勞
復故督郵顧子獻得病已瘥未健請華陀視脉曰雖瘥尚虛未得復陽氣不足慎勿勞事餘勞尚可女勞則死

當吐舌數寸其婦聞其夫瘥從百餘里來省之經宿交接中間三日發熱口噤臨死舌出數寸病新瘥未滿百
日氣力未平復而犯房室略無不死有士蓋正者疾愈後六十日已能行射獵犯房室即吐涎而死及熱病房
室名爲陰陽易之病皆難治多死近者有一士大夫小得傷寒瘥已十餘日能乘馬往來自謂平復犯房室即
小腹急痛手足拘攣而死 時病瘥後未滿五日食一切肉麵者病更發大困 時病瘥後新起飲酒及韭菜
病更發 時病新瘥食生魚鮓下痢必不止 時病新瘥食生菜令顏色終身不平復 時病新瘥汗解飲冷
水者損心胞令人虛不復 時病新瘥食生棗及羊肉者必膈上作熱蒸 時病新瘥食犬羊等肉者必作骨
中蒸熱 時病新瘥食魚肉與瓜生菜令人身熱一本作腫 時病新瘥食蒜鱸者病發必致大困
黃龍湯 治傷寒瘥後更頭痛壯熱煩悶方 仲景名小柴胡湯 柴胡半斤半夏半升黃芩三兩人參二兩
甘草二兩生薑四兩大棗十二枚 右七味咬咀以水一斗煮取五升去滓服五合日三不嘔而渴者去半夏
加枳實根四兩

〔衍義〕少陽爲樞爲表裏之分限小柴胡湯爲少陽專方柴胡引清氣左行於膽開發少陽之所必需臆受
風木之邪病則寒熱交爭故用黃芩以泄中外之熱膽爲清淨之府病則濁痰四迄故用半夏以辟內沃之
涎然非人參甘草不能廓充大氣以禦外入之邪非生薑大棗不能開通經脈以和傷殘之氣千金借治瘥
後勞復之證以其既經一翻發泄則人參護持元氣尤爲切務因易之以嘉名形容神化不測之妙

補大病後不足虛勞方萬病虛勞同用 取七歲已下五歲已上黃牛新生者乳一升以水四升煎取一升如人體温

稍稍飲之不得過多十日服不絕為佳

枳實梔子湯 治大病瘥後勞復者方 枳實三枚 梔子十四枚 豉一升 右三味咬咀以酢漿七升先煎減三

升次內枳實梔子煮取二升次內豉煮五六沸去滓分再服覆取汗如有宿食者內大黃如博棋子五六枚

治傷寒温病後勞復或食或飲或動作方 梔子仁三七枚 石膏五兩 香豉一升 鼠屎尖頭大者二十枚 右四味咬咀

以水七升煮取三升分三服

治食大飽不消勞復脉實者方 豉一升 鼠屎二十枚 梔子七枚 大黃三兩 右四味咬咀以水六升煮取二

升分三服微取汗應小鴨溲者止不溲者復作

治新瘥早起及食多勞復方 豉五合 鼠屎尖頭者二十一枚 右二味以水二升煮取一升盡服之温臥令小汗愈

崔氏加梔子七枚尤良肘後有麻子仁內一升加水一升亦可內枳實三枚葱白一虎口

治重病新瘥早起勞及飲食多致復欲死方 燒籬甲末飲服方寸匕

治病新瘥遇美飲食食過多食復者方 取所食餘燒為末飲調服二錢七日三服

〔析義〕經云火淫所勝以苦發之此方加枳實於梔子豉湯中以發其微汗泄胸中虛煩正苦以發之也服

後覆取微汗乃吐中窩汗之變法若有宿食加大黃下奪之設泥病後不敢用下則熱持而真陰益困矣傷

寒論用清漿水空煎然後入藥同煎于金用酢漿和水煎服酸以收火氣之散也中暑方中漿水散從此竊出 傷寒病後勞復或飲食動作致病用梔子豉湯不加枳實而加石膏以解飲酒復熱加鼠屎以斂用醫虛陽然非溫病遺毒石膏不可輕用 食大飽不消勞復脈實梔子豉湯不加枳實而加大黃卽有宿食加大黃之法更加鼠屎以淨少陰伏熱之源 新瘥早起及女勞復但用乾鼓以辟不正餘邪鼠屎以化腎肝虛熱 大病新瘥早起復熱用藷甲末專取滋陰而餘熱自化 病新瘥後飲食過多復熱用所食之餘燒末服之既不傷元氣并無誤藥之失

麥門冬湯

治勞復氣欲絕起死人方 麥門冬一兩 甘草二兩 京棗二十枚 竹葉切一升 右四味咀咀以水七

升煮粳米一升令熱去米內諸藥煎取三升分三服不能服者綿滴湯內口中用之有效

治食勞方

麵二升煮取汁服之○又方 杏仁五十枚以酢二升煎取一升服之取汗

欲令病人不復方 燒頭垢如梧桐子大吞服之

治傷寒瘥後一年心下停水不能食者方

生地黃五斤 白朮一斤 好麵二斤 右三味合搗令相得曝乾下

篩酒服方寸匕日三加至二七

〔衍義〕勞復氣欲絕胃虛火乘於肺也方用麥冬滋肺竹葉清心甘草和中京棗以培脾氣之耗也 食勞

用麵煮取汁服以安少陽生發之氣然在西北風土剛燥之地爲當東南卑濕之所徒資濕熱良非所宜

杏仁泄肺之滿苦酒收氣之散散中寓收之法惟素稟可恃者為宜 傷寒向愈之時欲令病氣不復乃取頭垢燒服反本還元以收上盛之熱也 傷寒瘥後經年停水心下不食用生地黃和朮酒服欲除水氣蟲積必得涌吐方效昔人以鮮地黃搗汁搜麵作冷淘食之取吐不吐則利出長蟲如辟宮而安取義雖同而緩攻急迫之法不侔也

論曰婦人温病雖瘥若未平復血脉未和尙有熱毒而與之交接得病者名為陰陽易病其人身體重熱上衝胸頭重不能舉眼中生眵一作膜眩一作膝拘急小腹絞痛手足拳者即死其亦有不即死者病苦小腹裏急

熱上衝胸頭重不欲舉百節解離經脈緩弱血氣虛骨髓竭便噓噓吸吸氣力轉少著牀不能動搖起止仰人或引歲月方死醫者張苗說有婢得病瘥後數日有六人姦之皆死

治婦人得病易丈夫丈夫得病易婦人方 取女人中裋近隱處燒服方寸七日三小便即利陰頭微腫此為愈矣女人病可取男裋一如此法

治交接勞復陰卵腫縮腹中絞痛便欲死方 取所交接婦人衣服以覆男子立愈
令人病不復方 取女人手足爪二十枚女人中衣帶一尺燒以酒若米飲汁服之

治男子新病起近房內復者方 取女人月經赤帛燒服方寸七亦治陰卵腫縮入腹絞痛欲死

治病後髮亂不可理通頭法 生麻油二斤將頭髮解開安銅沙羅中用油淹漬之細將釵子理髮斯須並白

通矣

〔衍義〕陰陽易病雖言傷寒遺毒而實熱病居多以冬時伏氣藏於骨髓之中無由發泄得交接之淫火溢出乘虛襲入髓竅傳於不病之人蓋傷寒之邪傷於血脈之中可從汗下而解卽解之未盡熱毒較輕非若伏藏之毒最盛而人感之則身重少氣少腹裏急陰中拘攣熱上衝胸頭重不舉眼中生花膝脛拘急乃陰中暴受熱毒又非蕩滌所宜故燒襪爲散以其人平昔所出敗濁同氣相求服之小便得利陰頭微腫陰毒仍從陰竅而出也 或以所交婦人衣服覆男子者亦取同氣之應也 或以女人爪甲衣帶燒服取筋之餘以療宗筋之病也 或以女人月經赤帛燒服法與棍襪無異

百合第十二論二首 方七首

論曰百合病者謂無經絡百脈一宗悉致病也皆因傷寒虛勞大病已後不平復變成斯病其狀惡寒而嘔者病在上焦也二十三日當愈其狀腹滿微喘大便堅三四日一大便時復小溇者病在中焦也六十三日當愈其狀小便淋瀝難者病在下焦也三十三日當愈各隨其證以治之百合之爲病令人意欲食復不能食或有美時或有不用聞飲食臭時如有寒其實無寒如有熱其實無熱常默默欲臥復不得眠至朝口苦小便赤澀欲行復不能行諸藥不能治治之卽劇吐利如有神靈所爲也百合病身形如和其脈微數其候每溇時卽覺頭痛者六十日乃愈百合病候之溇時頭不覺痛淅然寒者四十日愈百合病候之溇時覺快然但覺頭眩

者二十日愈百合病證其人或未病而預見其候者或已病四五日而出或一月二十日後見其候者治之善

誤也依證治之 論曰百合病見在於陰而攻其陽則陰不得解也復發其汗為逆也見在於陽而攻其陰則

陽不能解也復下之其病不愈 要略云見於陰者以陽法救之見於陽者以陰法解之見陽攻陰復發其汗此為逆其病難治見陰攻陽乃復下之此亦為逆其病難治

百合知母湯 治百合病已經發汗後更發之方 百合七枚 知母三兩 右二味以泉水先洗漬百合一宿

當沫出水中明旦去水取百合更以泉水二升煮取一升汁置之復取知母切以泉水二升煮取一升汁合

和百合汁中復煮取一升半分再服不瘥更依法合服

百合滑石代赭湯 治百合病已經下後更發者方 百合七枚 滑石三兩 代赭一兩 右三味先以泉水漬

百合一宿明旦去水更以泉水二升煮百合取一升去滓又以水二升煮餘二味取一升內百合汁如前法

復煎取一升半分再服

百合雞子湯 治百合病已經吐後更發者方 以百合七枚漬一宿去汁以泉水二升煮取一升取雞子黃

一枚內汁中攪合調分再服

百合地黃湯 治百合病始不經發汗吐下其病如初者方 以百合七枚璧漬一宿去汁以泉水二升煮取

一升半內生地黃汁一升復煎取一升半分再服大便當去惡沫為驗也

治百合病經月不解變成渴者方 百合根一升以水一斗漬一宿以汁先洗病人身洗身後食白湯餅勿與

鹽鼓也渴不瘥可用栝蘘根并牡蠣等分爲散飲服方寸七日三

治百合病變而發熱者方

百合根一兩滑石三兩

右三味治下篩飲服方寸七日三當微利利止勿復服

熱卽除一本云治百合病小便赤澀臍下堅急

治百合病變腹中滿痛者方

但取百合根隨多少熬令黃色搗篩爲散飲服方寸七日三滿消痛止

〔衍義〕

病無經絡可分百脈一宗致病故名百合其病雖有上中下三焦之別皆由傷寒虛勞大病後虛火

擾其血脈所致是以欲食不食如寒無寒如熱無熱欲眠不眠欲行不行皆陽火燥陰無可奈何之狀藥雖

治病然必藉胃氣以行之若毒血在脾胃經脈閉塞藥雖入而胃弱不能行故得藥轉劇而吐利也病不在

皮肉筋骨則身形如和故脈微數脈數血熱則心火上炎不下交於腎而膀胱之經亦不得引精於上上虛

則血濁時淅然頭眩甚則爲頭痛以此微甚可卜愈日之遠近也其治法咸用百合爲君以安心補神能去

中之熱利大小便導滌痰積然必鮮者方克有濟若汗之而失者佐知母以調其上焦之津液下之而

失者佐滑石代赭以理其下焦之痹結吐之而失者佐雞子黃以補其中焦之營血若不經發汗吐下

而血熱自汗但佐生地黃汁以涼血血涼則熱毒解而蘊結自行故大便當去惡沫也其經月不解百脈

內蘊津液外泄而成渴者則用百合洗之一身之脈皆得通暢而津液行渴自止勿食鹽豉者以味鹹能凝

血也若洗後渴不瘥是汗多津脫則以栝蘘牡蠣以斂固之若變發熱乃血脈鬱而成熱佐滑石以通

利之 百合病皆持兩端不表不裏爲其熱行血脈之中非如傷寒可行汗下法所以每多扼腕往往有綿延經歲不已者愈期不復可拘也但當隨所稟偏勝而調之慎勿誤認下元虛弱妄用溫補之法也

傷寒不發汗變成狐惑第十三論一首 方三首

論曰狐惑之病其氣如傷寒默默欲眠目不得閉起臥不安其毒在喉咽爲惑病在陰肛爲狐病狐惑之病並惡飲食聞食臭其面目翕赤翕白翕黑毒食於上者則聲喝也喝一作嘔毒食下部者則乾咽也此由溫毒氣所爲食於上者瀉心湯主之食於下者苦參湯淹洗之食於肛外者熏之并用雄黃三片稍置瓦瓶中炭火燒向肛熏之并服湯也

治狐惑湯方 黃連四兩 薰草二兩 右二味咬咀白酢漿一斗漬一宿煮取三升分爲三服

〔衍義〕狐惑總由濕熱生蟲以致默默欲眠寢食不安有似乎狐之性多惑多疑故以比類名病通用瀉心湯專攻濕熱固結之邪方中乾薑以行苓連之性人參以行苓連之力淹洗用苦參者取其苦燥專除濕化之蟲熏用雄黃取純陽之性以散濁惡之毒也服用黃連薰草黃連卽瀉心湯中專主佐以薰草專辟惡氣卽瀉心湯中乾薑之義煮用酢漿專收濕化之蟲味少力專其功不在瀉心之下耳

赤小豆當歸散 其人脈數無熱微煩默默但欲臥汗出初得之三四日目赤如鳩眼得之七八日其四眦黃黑能食者膿已成也治之方 以赤小豆三升漬之令生芽足乃復乾之加當歸三兩爲末漿水服方寸

七日三即愈

〔衍義〕此方專主熱毒鬱於脈流入大腸而成狐惑之候其脈數無熱知熱不在表而在血也默默欲臥熱毒傷陰陰主靜也初得之二三日目赤如鳩眼七八日目四眇黃黑血溢於經不散凝積而爲瘡也膿成則毒從外化無關於裏故能食也方以赤小豆清熱利水且浸令芽出以發越蘊積之毒佐當歸司統血之權使不致於散漫也至於先便後血亦主此方以清小腸流入大便熱毒之源見證雖異而主治則同也

瀉心湯 其病形不可攻不可灸因火爲邪血散脈中傷脈尙可傷臟則劇并輸益腫黃汁出經合外爛肉腐爲癰膿此爲火疽醫所傷也夫脈數者不可灸因火爲邪卽爲煩因虛逐實血走脈中火氣雖微內攻有力焦骨傷筋血雖復也應在瀉心瀉心湯兼治下痢不止腹中愞堅而嘔吐腸鳴者方 大黃二兩黃連 黃芩各一兩 右三味咬咀以水三升煮取一升頓服

〔衍義〕按傷寒論中瀉心湯五方方名各別惟金匱瀉心湯一方方合血中之火例治而集方者不察誤收半夏瀉心湯詳方中參半薑棗渾是溫氣之品殊非因火爲邪焦骨傷筋所宜因力正之

傷寒發黃第十四

論三首 證五首
方三十四首 鍼灸圖

論曰黃有五種有黃汗黃疸瘧疸酒疸女勞疸黃汗者身體四肢微腫胸滿不渴汗出如黃柏汁良由大汗出卒入水中所致黃疸者一身面目悉黃如橘柚暴得熱以冷水洗之熱因留胃中食生冷瓜果所致若成黑疸

者多死穀疸者食畢頭眩心忪怫鬱不安面發黃由失飢大食胃氣衝熏所致酒疸者心中懊懣足脛滿小便黃面發赤斑黃黑由大醉當風所致女勞疸者身目皆黃發熱惡寒小腹滿急小便難由大勞大熱而交接寬入水所致但依後方治之 黃汗之爲病身體浮腫發熱汗出而渴狀如風水汗沾衣色正黃如柏汁其脈自沉從何得之此病以汗出入水中浴水從汗孔入得之

黃芪芍藥桂酒湯

治黃汗方

黃芪五兩芍藥三兩桂心二兩

右三味咬咀以苦酒一升水七升合煎取

三升飲一升當心煩也至六七日稍稍自除心煩者苦酒阻故也

〔衍義〕水濕從外漸漬於經非桂之辛溫無以驅之達表既用桂芍內和營血卽以黃芪外壯衛氣以杜濕邪之復入猶恐芪芍固護不逮更用苦酒收斂津液不使隨藥外泄然服藥後每致心煩乃苦酒阻絕陽氣不能通達之故須六七日稍和心下方得快然非若水煎湯液之性味易過也

黃疸之病疸而渴者其病難治疸而不渴其病可治發於陰部其人必嘔發於陽部其人振寒而微熱

桂枝黃芪湯

治諸病黃疸宜利其小便假令脈浮當以汗解方

桂枝 芍藥

生薑各三兩

甘草二兩黃芪

五兩大棗十二枚

右六味咬咀以水八升微火煎取三升去滓溫服一升覆取微汗須臾不汗者飲稀熱粥

以助湯若不汗更服湯

〔衍義〕

桂枝湯加膠飴名小建中取稼穡之甘入胃護營不獨爲風傷衛之本藥卽寒傷營之尺中微弱營

氣不足血少之證亦得用之於小建中內更加黃芪名黃芪建中以治諸虛羸瘦金匱為虛勞不足祛邪補正之首方千金又加當歸名當歸內補建中以治產後虛羸腹痛此但加黃耆助衛逐濕原無實衛之功亦無內補之用乃金匱之原方也

麻黃醇酒湯方 治傷寒熱出表發黃疸方 麻黃三兩以醇酒五升煮取一升半盡服之溫覆汗出即愈冬月寒時用清酒春月宜用水

〔衍義〕著芍桂酒湯斂中寓散桂枝黃耆湯散中寓斂麻黃醇酒湯散中加散方中麻黃散表可謂專矣更加酒煎協濟麻黃開發營中濕熱一舉而汗散無餘即此緩急之治可識受病之淺深矣

治黃疸方 瓜蒂 秫米 赤小豆各二枚 右三味治下篩病重者取如大豆二枚內著鼻孔中痛縮鼻須臾

當出黃汁或從口中出汁升餘則愈病輕者如一豆不瘥間日復用又下里間以筒使人極吹鼻中無不死

大慎之刪繁瘵天行毒熱通貫臟腑沉伏骨髓之間或為黃疸黑疸赤疸白疸穀疸馬黃等病喘息須臾不絕

〔衍義〕見嬰兒傷寒發黃門中

大黃丸 治同前 大黃 葶藶子各二兩 右二味為末蜜和丸如梧子大每服十丸日三病瘥止○又方

大黃二兩黃連三兩黃柏 黃芩各一兩 麩衣五合 右五味為末蜜丸如梧子大先食服三丸日三不知加

至五丸

〔衍義〕大黃丸二方皆從金匱大黃硝石湯化出彼用硝石之辛溫以行大黃梔柏之苦寒此用葶磨佐大黃之開泄不必復用硝石散結也 次方取麴末以佐四黃之滌熱卽是硝石佐大黃梔柏之義識此變通諸法可推金匱妙用也

茵陳湯 治黃疸身體面目盡黃方 茵陳 黃連各一兩 黃芩二兩 大黃 甘草 人參各一兩 梔子二十枚 右

七味咬咀以水一斗煮取三升分三服日三亦治酒疸酒癖

〔衍義〕茵陳蒿湯本治傷寒瘀熱在裏而發黃又合金匱瀉心湯恐苦寒過甚有傷沖和之氣故加人參甘草扶助胃氣以行祛濕之力殊非虛而用補之意

三黃散 治同前 大黃 黃連 黃芩各四兩 右三味治下篩先食服方寸七日三亦可爲丸

〔衍義〕此卽金匱瀉心湯三味但分兩稍異變湯爲散專取和滓以祛濕熱也

五苓散 治黃疸利小便方 豬苓 茯苓 澤瀉 白朮 桂心各三銖 右五味搗篩爲散渴時水服方寸

七極飲水卽利小便及汗出愈此與第九卷方相同以分兩不同故重出

〔衍義〕五苓散中全賴桂之辛散利水逐熱金匱加茵陳治黃疸尤捷

秦椒散 治黃疸飲少溺多方 秦椒六銖 瓜蒂半兩 右二味治下篩水服方寸七日三

〔衍義〕黃疸飲少而溺反多雖有濕熱固結於中因胸中之陽本虛所以不能消水故用秦椒之辛烈溫中

破結瓜蒂之苦寒逐濕除寒不得泛用利水藥傷伐下焦陽氣也

小半夏湯

治黃疸小便色不異欲自利腹滿而喘者不可除熱熱除必噦方

半夏

生薑各半斤

右二味

噦咀以水七升煮取一升五合分再服有人常積氣結而死其心上暖以此湯少許汁入口遂活

〔衍義〕黃疸雖小便之色不異然必不能清利如常以濁濕之氣上逆而致喘滿設不審中氣之本虛誤與

苦寒必致嘔噦自利故借金匱生薑半夏湯以治胸中似喘不喘似嘔不嘔似噦徹心中憤憤然無可奈何之狀與此恰合使胸中氣化通痰逆降則黃疸不治而治矣

治黃疸方

取生小麥苗搗絞取汁飲六七合晝夜三四飲三四日便愈無小麥穰麥亦得用之

〔衍義〕小麥苗搗絞取汁以其得春升之氣最早故取以通達肝氣之滯無苗穰亦可性與青苗不異

治黃疸變成黑疸醫所不能治者方

土瓜根搗汁一小升頓服日一平旦服至食時病從小便出先須量病

人氣力不得多服力衰則起不得

〔衍義〕土瓜根卽王瓜之根性味寒滑通津化熱本經主治與栝蘘根相類其治黃疸變黑惟濕熱久漬不

得下泄通身浮腫黯黑者爲宜若用以治女勞疸及飲酒使內額上黑之陰疸虛實寒熱迥異豈但力衰不

得起而已哉

治發黃身面目悉黃如金色小便如濃煮柏汁衆醫不能療者方

茵陳

梔子各四兩

黃芩

大黃

柴胡

升麻各三兩 龍膽二兩 右七味咀咀以水八升煮取二升七分三服若身體羸去大黃加梔子五六兩生

地黃一升延年秘錄無茵陳有梔子四兩枯藁三兩芒硝二兩近效方加枳實二兩 夫黃發已久變作桃皮色心下有堅嘔逆不下飲食小便極

赤而少四肢厥冷脈深沈極微細遲者不宜服此方得下必變碗也宜與大茵陳湯除大黃加生地黃五兩

服盡湯消息看脈小浮出形小見不甚沉微便可治也脈浮見者黃當明不復作桃皮色心下自寬也

〔衍義〕痘病而致通身面目悉黃濁如濃煎柏汁濕熱漸漬已劇雖日用茵陳大黃不得升麻柴胡開提於

上龍膽梔子降泄於下何能分解其勢而使之克應哉其方後有云若身體羸去大黃加梔子生地黃以清

血中之熱為不去龍膽而去大黃以目黃證在肝經是以不得不用耳若黃久不除變作桃皮色者是中氣

為水濕所遏不得運行中外所以心下有堅嘔逆不食雖四肢逆冷六脈深沉但審其小便赤少知為熱鬱

在裏而傷耗津液又當推大茵陳湯亦須去大黃易生地黃方為合法

大茵陳湯 治內實熱盛 黃黃如金色脈浮大滑實緊數者大發黃多是酒客勞熱食少胃中熱或溫毒內

熱者故黃如金色方 茵陳 黃柏各一兩半 大黃 白朮各三兩 黃芩 甘草 茯苓 栝蘘根 前胡 枳實

各二兩 梔子二十枚 右十一味咀咀以水九升煮取三升分三服得快下消息三四日更治之

〔衍義〕發黃本乎濕熱濕熱本乎脾虛此以枳朮荅甘加入茵陳蒿湯中助脾逐濕佐以前胡栝蘘下氣通

津黃柏黃荅燥濕清火皆本經治諸熱黃之專藥較茵陳蒿湯功力倍常因以大字銜之

苦參散 治人無漸忽然振寒發黃皮膚黃黼塵出小便赤少大便時閉氣力無異飲食不妨已服諸湯散餘

熱不除久黃者宜吐下方 苦參 黃連 瓜蒂 黃柏 大黃各一兩 葶藶二兩 右六味治下篩飲服方

寸匕當大吐吐者日一服不吐日再亦得下服五日知可消息不覺退更服之小折便消息之

〔衍義〕病起於忽然振寒知為少陽火氣鬱發奪其春升之令津液不能灌充所以色黃枯悴有如黼塵出

現於皮膚洵為膽熱無疑更審二便閉瀉飲食如故胃氣尚堪克任苦寒故用苦參三黃峻攻濕熱兼瓜蒂

佐苦參取吐於上葶藶佐大黃降泄於下上下開泄急通少陽之樞則津液方得灌充是皆病起於暴之至

治也若因病而漸次成疸正氣本虛之證又非此方可擬也

治發黃方 茵陳 黃柏 梔子 大黃各三兩 黃連二兩 右五味咬咀以水九升煮取三升分三服先服

湯後服丸方 大黃五兩 茵陳 梔子各三兩 黃芩 黃柏 黃連各二兩 右六味為末蜜丸如梧子大白飲

服二十丸令微利

〔衍義〕梔子柏皮湯本治熱蘊於經身黃發熱茵陳蒿湯本治瘀熱在裏不能發越頭汗身黃此兼二方之

制以治表裏俱熱乃於梔子柏皮湯中除去甘草之甘緩而加黃連之苦燥以緩攻其餘此先後緩急之治

也

麻黃連翹赤小豆湯 治傷寒瘀熱在裏身體必發黃方 麻黃 連翹 甘草各二兩 生薑三兩 大棗十二枚 杏仁

三十 赤小豆一升 生梓白皮二升

切

右八味咬咀以勞水一斗先煮麻黃去沫次內諸藥煎取三升分三服

〔衍義〕傷寒論瘀熱在裏而發黃有二方茵陳蒿湯治瘀熱在裏不得發越而頭汗身黃故用茵陳梔子大黃引之下泄此治傷寒之邪失於表散或汗之不徹瘀熱在裏而身發黃故借用麻黃湯法於中減却桂枝增入連翹梓皮赤小豆清熱利水生薑大棗開發肌腠使濕熱之氣半從元府而解半從滲道而解不可泥詞害義以為瘀熱在裏反用表藥致惑也

茵陳蒿湯 治傷寒七八日內實瘀熱結身黃如橘小便利腹微脹滿宜下之方 茵陳六兩 大黃三兩 梔子十四枚

右三味咬咀以水一斗二升先煮茵陳取五升去滓次內梔子大黃煎取三升分服一升日三小

便當利如皂莢沫狀色正赤當腹減黃悉隨小便去也

范注用療殺疸小品方用石膏一斤

〔衍義〕見前麻黃連翹赤小豆湯下

大黃黃柏湯 治發黃腹滿小便利而赤自汗出此為表和裏當下之方 大黃三兩 黃柏 芒硝各四兩 梔子十五枚

右四味咬咀以水六升煮取二升去滓內芒硝緩煎取一升先食頓服之

〔衍義〕發黃而見腹滿溺赤全是裏實之驗故宜急追無容憚緩硝黃梔柏雖云峻攻之味而實保全真陰

之上藥也

茵陳丸 治時行病急黃并瘡癘疫氣及瘡疔方 茵陳 梔子 芒硝 杏仁各三兩 巴豆半兩 恆山 鱉甲

各二
兩 鼓五合 大黃五兩

右九味為末以錫和丸如梧子大飲服三丸以吐利為佳不知加一丸初覺體氣

有異急服之即瘥神效

〔衍義〕瘡瘍疫瘧忽然發黃難與尋常疸證並論方中硝黃茵陳梔子不得巴豆蕩滌之力則毒熱不能從之下奪乾豉杏仁專解時行之邪恆山鱉甲專祛疫瘧之毒也

治急黃熱氣骨蒸兩目赤脈方

芒硝一兩

大黃一兩

半末生地黃汁八合

右二味合和一服五合日二以利為度

不須二服

〔衍義〕疸發而見骨蒸似乎虛象以病起於急屬實何疑其兩目脈赤又為血熱之驗故於金匱大黃硝石湯中裁去黃柏梔子之苦寒加入生地黃汁專化血脈之滯也

治風疸小便或黃或白灑灑寒熱好臥不欲動方

三月生艾

一束搗取銅器中煎如漆密封之

苦參

大黃

黃連

凝水

石 栝蘘根

葶藶各六兩

右七味以大味為末艾煎和丸如梧子大先食服五丸日二可加至二十九丸

熱加苦參渴加栝蘘小便澀加葶藶小便多加凝水石小便白加黃連大便難加大黃

〔衍義〕病人濕熱內盛加以風邪外襲所以灑灑寒熱其證懶於動作嗜臥小便或白或黃皆濕熱時降時

升之驗故於苦參散中裁汰瓜蒂黃柏進用艾汁溫散風熱兼凝水石栝蘘佐諸苦寒以行津化熱為務也

寸口脈浮而緩浮則為風緩則為痺痺非中風四肢苦煩脾色必黃癢熱以行跗陽脈緊而數數則為熱熱則

消穀緊則為寒食則滿也尺脈浮為傷腎跗陽脈緊為傷脾風寒相薄食穀即眩穀氣不消胃中苦澗澗氣下流小便不通陰被其塞熱流膀胱身故盡黃名曰穀疸

治勞疸穀疸丸 苦參三兩龍膽一兩 右二味為末牛膽和為丸如梧子大先食以麥粥飲服五丸日三不

知稍加之刪繁方加梔子仁三七枚以猪膽和為丸

〔衍義〕稼穡作甘而蘊熱發黃故用苦參之苦燥以攻穀疸之蘊熱龍膽之苦寒以瀉勞疸之積火丸用牛膽汁取以為膽熱之嚮導先食麥粥飲服乃金匱硝石礬石散之成法取助胃氣以行藥力也

夫酒疸其脈浮者先吐之沉弦者先下之夫人病酒疸者或無熱靖言了了腹滿欲吐嘔者宜吐之方前苦參散七味者是酒疸必小便不利其候當心中熱足下熱是其證也夫酒疸下之久久為黑疸目青面黑心中如啖蒜齏狀大便正黑皮膚爪之不仁其脈浮弱雖黑微黃故知之

枳實大黃湯 治傷寒飲酒食少飲多痰結發黃酒疸心中懊懣而不甚熱或乾嘔方 枳實五枚大黃三兩

豆豉半升梔子七枚 右四味啜咀以水六升煮取二升分三服心中熱疼懊懣皆主之

〔衍義〕此即傷寒勞復枳實梔子豉湯若有宿食加大黃之法使宿食可化濕熱可祛黃疸自除即胸中懊

懣舍梔子豉湯別無良法

凝水石散 治內疸飲少小便多如白泔色此病得之從酒方 凝水石 白石脂 栝藋根 桂心各三兩

絲子 知母 各十 右六味治下篩麥粥飲服五分七日三服五日知十日瘥

〔衍義〕治痘通用逐濕利水而此獨用寒水石治身熱腹中積聚邪氣皮中如火燒煩滿專治腎臟虛火深得本經之奧至於白石脂性專固脫殊非痘病所宜以其飲少瀉多色白如泔知為腎虛標熱故以桂心兔絲佐白石英溫補下元知母栝藎佐寒水石兼化標熱病因飲酒使內故名之曰內疽

茯苓丸 治心下縱橫堅而小便赤是酒疸者方 茯苓 茵陳 乾薑 各一兩 白朮 熬 枳實 各三 半夏 杏仁

各十 八銖 甘遂 六銖 蜀椒 當歸 各十 右十味為末蜜和丸如梧子大空腹服三丸日三稍稍加以小便利為

度 翼方加黃連一兩大黃十八銖名茵陳丸治黑疸身體關黑小便澀

〔衍義〕前凝水石散治內疸此茯苓丸治酒疸乃酒積漬於心下按之縱橫格指故用蜀椒乾薑溫散堅痞枳朮茯苓半健運痰濕杏仁當歸下氣和血甘遂茵陳破結利水為酒疸開辟去路也

半夏湯 治酒癖陰胸心脹滿骨肉沉重逆害飲食乃至小便赤黃此根本虛勞風冷飲食衝心由脾胃內痰

所致方 半夏 一升 薑 黃芩 茵陳 當歸 各一兩 前胡 枳實 甘草 大戟 各二兩 茯苓 白朮 各三

右十一味啖咀以水一斗煮取三升分作三服

〔衍義〕茯苓丸治胸中寒飲故用蜀椒乾薑半夏湯治胃中熱痰故用黃芩生薑此方中前胡甘草則前方杏仁之意此方中大戟即前方甘遂之意其餘則兩方並用總皆健運中氣之品中氣健運雖根本虛勞藥

無不應酒疸無客留之患矣

牛膽丸 治酒疸身黃黧塵出方 牛膽二枚 芫花一升 薤花半升 瓜蒂三兩 大黃八兩 右五味四味咀

以清酒一斗漬一宿煮減半去滓內牛膽微火煎令可丸如大豆服一丸日移六七尺不知復服一丸至八丸膈上吐膈下利或不吐而自愈

〔衍義〕靈樞有云酒氣慄悍入於胃中則胃脹氣上逆滿於胸中肝浮膽橫膽之熱滿而汁溢於外以漸滲於經絡則身目皆黃芫花薤花瓜蒂大黃一派苦寒藉牛膽汁為丸引入膽家隨其瀉利以取吐下則津液流通黧塵之色自化前治勞疸穀疸方中用牛膽汁是瀉積勞之火此用牛膽汁以瀉酒濕之熱也

茵陳丸 治氣淋臙脹腹大身體面目悉黃及酒疸短氣不得息方 茵陳 天門冬 梔子各四兩 大黃 桂

心各三兩 通草 石膏各二兩 半夏半升 右八味蒸大黃通草天冬梔子半夏曝令乾合搗篩蜜丸如大豆服

三丸日三息生魚以豆羹服不得用酒 一方去石膏內滑石二兩不知加至十丸

〔衍義〕詳方下臙脹腹大皆由濕熱氣蒸而致面目悉黃短氣不得息故以導氣化熱為主惟桂心熱因熱用之內應卽酒疸亦不出此

黃家至日晡所發熱而反惡寒此為女勞得之當膀胱急小腹滿體盡黃額上黑足下熱因作黑疸其腹臙脹而滿如欲作水狀大便必黑時溇泄此女勞疸非水也腹滿者難治

硝石礬石散

治女勞疸方

硝石

礬石各半兩

右二味治下篩大麥粥汁服方寸七日三重衣覆取汗病

隨大小便出小便正黃大便正黑

〔衍義〕五疸之中以黑疸爲最劇而黑疸之因有二一從女勞得之一從酒疸不慎而變黑色總皆腎虛之候病則日晡發熱而反惡寒陰邪鬱抑陽氣也膀胱急小腹滿陰邪結於陰分也身黃額上黑陰邪上侮陽位也足下熱陰虛陽必湊之也腹滿臃脹濁陰之氣上逆也如欲作水狀大便黑時溇本非水病而化血爲水也腹滿者難治瘀血固結陰虛難於峻攻也然病雖危迫又不忍納手坐視金匱乃竭厥心力急需硝石以攻固結之陰邪皂礬以破委積之瘀垢爲女勞疸開一死中求活法門圖僥倖於萬一在虛不勝攻勢不獲已者則以硝石和礬硃神麩和丸大麥粥汁服十九至二十九丸且有瘀血發黃正氣衰敗而變黑疸瀕危尤甚盧扁不能爲力也

濕疸之爲病始得之一身盡疼發熱面色黑黃七八日後壯熱熱在裏有血當下去之如狔肝狀其小腹滿者礬石滑石散急下之亦治一身盡黃目黃腹滿小便不利方 礬石 滑石各五兩 右二味治下篩以大麥粥

汁服方寸七日三先食服之便利如血者已當汗出瘥

〔衍義〕此祖金匱女勞疸法復立礬石滑石散因血既下如狔肝狀雖小腹當滿量結必不甚堅故但取皂礬之滌垢佐滑石以利竅不須硝石峻攻也

黃疸之爲病日晡所發熱惡寒小腹急身體黃額黑大便溏黑足下熱此爲女勞腹滿者難治治之方
滑石石膏散 滑石、石膏等分 右二味治下篩大麥粥汁服方寸七日三小便極利則瘥

〔衍義〕證雖日晡發熱惡寒身黃額上微黑而無血下如狹肝狀縱大便溏黑諒無實結可攻故重立滑石
石膏散但用石膏佐滑石利斲化熱并去皂礬之堅攻此隨證以定法外之法仍不出法中之法也 詳前
後諸方獨不及陰黃之治者以秦中稟賦剛強絕無虛寒之患故無藉於辛溫之藥也

鍼灸黃疸法

正面圖第一

寅門

上斷

上腭

俠人中

俠承漿

舌下

陰縫

寅門穴 從鼻頭直入髮際度取通繩分爲三斷繩取一分入髮際當繩頭鍼是穴治馬黃黃疸等病

上斷裏穴 正當人中及脣鍼三錐治馬黃黃疸等病

上腭穴 入口裏邊在上縫赤白脈是鍼三錐治馬黃黃疸四時等病

舌下穴 俠舌兩邊鍼治黃疸等病

脣裏穴 正當承漿裏邊通齒斷鍼三錐治馬黃黃疸寒暑溫疫等病

顛顛穴 在眉眼尾中間上下有來去絡脈是鍼灸之治四時寒暑所苦疸氣溫病等

俠人中穴 火鍼治馬黃黃疸疫通身並黃語言已不轉者

俠承漿穴 去承漿兩邊各一寸治馬黃急疫等病

巨闕穴 在心下一寸灸七壯治馬黃黃疸急疫等病

上臑穴 在心下二寸灸七壯治馬黃黃疸等病

男陰縫穴 拔陰反向上灸治馬黃黃疸等病 若女人玉門是穴男女鍼灸無在

覆面圖第二 風府 熱府 肺膈 心膈 肝膈 脾膈 腎膈 脚後跟

風府穴 在項後入髮際一寸去上骨一寸鍼之治頭中百病馬黃黃疸等病

熱府穴 在第二節下兩傍相去各一寸五分鍼灸無在治馬黃黃疸等病

肺膈穴 從大椎數第三椎兩傍相去各一寸五分灸主黃疸通治百毒病

心膈穴 從肺膈數第二椎兩傍相去各一寸五分

肝膈穴 從心膈數第四椎兩傍相去各一寸五分

脾膈穴 從肝膈數第二椎兩傍相去各一寸五分

腎膈穴 從脾膈數第三椎兩傍相去各一寸五分

脚後跟穴 從白肉後際鍼灸隨便治馬黃黃疸寒暑諸毒等病

側面圖第三 耳中 頰裏 手太陽 聾石子頭 錢孔 太衝

耳中穴 在耳中孔上橫梁是鍼灸之治馬黃黃疸寒暑疫毒等病

頰裏穴 從口吻邊入往對頰裏去口一寸鍼主治馬黃黃疸寒暑温疫等病頰兩邊同法

手太陽穴 手小指端灸隨年壯治黃疸

臍石子頭穴 還取病人手自捉臂從腕中太澤澤當作淵文向上一尺接白肉際灸七壯治馬黃黃疸等病

錢孔穴 度乳至臍中屈助頭骨是灸百壯治黃疸

太衝穴 鍼灸隨便治馬黃黃疸温疫毒等病

温瘧第十五 論一首 方三十一首 灸刺法 十九首 藏瘧法一首 符二首

論曰夫瘧者皆生於風夏傷於暑秋為瘧瘧也問曰瘧先寒而後熱者何也對曰夫寒者陰氣也風者陽氣也先傷於寒而後傷於風故先寒而後熱也病以時作名曰寒瘧問曰先熱而後寒者何也對曰先傷於風而後傷於寒故先熱而後寒也亦以時作名曰温瘧其但熱而不寒者陰氣先絕陽氣獨發則少氣煩悶手足熱而欲嘔名曰瘧瘧問曰夫病温瘧與寒瘧而皆安舍舍於何藏對曰温瘧者得之冬中於風寒氣藏於骨髓之中至春則陽氣大發邪氣不能自出因遇大暑腦髓鑠肌肉消腠理發泄因有所用力邪氣與汗皆出此病邪氣先藏於腎其氣先從內出之於外也如是則陰虛而陽盛盛則病矣衰則氣復反入入則陽虛虛則寒矣故先熱而後寒名曰温瘧問曰瘧瘧何如對曰瘧瘧者肺素有熱氣盛於身厥逆上衝中氣實而不外泄因有所用力腠理開風寒舍於皮膚之內分肉之間發則陽氣盛陽氣盛而不衰則病矣其氣不及於陰故但熱而不寒

氣內藏於心而外舍於分肉之間令人消鑠脫肉故名曰瘡瘡夫瘡之巨發也陰陽之巨移也必從四肢始也陽已傷陰從之故氣未并先其時一食頃用細左索緊束其手足十指令邪氣不得入陰氣不得出過時乃解夫瘡脈自弦也弦數者多熱弦遲者多寒弦小緊者可下之弦遲者可溫之若脈緊數者可發汗鍼灸之脈浮大者吐之瘡脈弦數者風發也以飲食消息止之

瘡歲歲發至三歲或連月發不解者以膏下有痞也治之不得攻其痞但得虛其津液先其時發其汗服湯已先小寒者引衣自覆汗出小便利即愈瘡者病人形瘦皮上必粟起也病瘡一日發當以十五日愈設不瘡當月盡解也不愈當云何師曰此病結為癥瘕名曰瘡母急當治之

蠶甲煎丸主治方 蠶甲十二分 半夏 人參各一分 大戟 瞿麥 桃仁 海藻 葶藶各二分 阿膠 紫葳 石

韋 乾薑 大黃 厚朴 桂心 蝨蟲各三分要 廬蟲 丹皮 芍藥各五分 蜂窠四分 蛻螂 柴胡各六兩

烏扇 黃芩各十銖 右二十四味為末取鍛龜下灰一斗清酒一斛五斗以酒漬灰取酒煮蠶甲盡爛泯泯

如漆絞去滓下諸藥煎為丸如梧子大未食服七丸日三仲景方無大載多赤硝

〔衍義〕北方水土剛勁瘡邪發越良難為害最重南方風氣柔弱發散皆易為患猶輕原其受病之因多由痰食內滯風邪外閉內外兼併所以寒熱交爭至於病久不除或治之不當結成瘡母必著於左脅者肝邪必結肝部也積既留著客邪內從火化當無外散之理故專取蠶甲伐肝消積尤妙在灰煮去滓後下諸藥

則諸藥咸得繫甲引入肝膽部分佐以柴胡黃芩同躋少陽區域參薑朴半助胃祛痰桂芍牡丹桃葳阿膠和營散血螻蛄蜂窠蠶廬烏扇聚毒勢攻嬰葦藻戟葶藶大黃利水破結未食前服七丸日服不過二十餘粒藥雖峻而不驟傷元氣深得峻藥緩攻之法又易金匱方中赤硝毒劣則易之以藻戟鼠婦難捕乃易之以蝨蠹略爲小變不失大端

柴胡栝蘘根湯。治瘧而發渴者方

柴胡八兩黃芩

人參

甘草

生薑各三兩

大棗二十枚

栝蘘根四兩

右七味㕮咀以水一斗二升煮取六升去滓煎取三升溫服一升日三

〔衍義〕少陽木火氣盛消爍陽明之津液是以煩渴瘧邪隨火進退總不離少陽之經合用小柴胡進退施治進用栝蘘退去半夏方合病機金匱方下并治火盛津傷之勞瘧專取栝蘘根之滋津化熱也小柴胡湯在傷寒瘧後頭痛壯熱煩悶方中易其名曰黃龍湯方後有云渴去半夏加栝蘘根可見用方在合病情不在主治何病也

蜀漆散。多寒者牡瘧也治之方

蜀漆

雲母

龍骨等分

右三味治下篩先未發一炊頃以酢漿服半

錢臨發服一錢溫瘧加蜀漆半分雲母燒三晝夜

〔衍義〕此以邪伏陰經故謂牝瘧金匱方從古誤刊牡瘧卽千金之智略不加察亦仍其誤而爲牡瘧趙以德金匱衍義註作心爲牡藏不特穿鑿且復支離曷知邪氣內藏於心則獨熱無寒謂之瘧瘧伏藏於腎則

多寒少熱謂之牝瘧濁陰痰涎深伏幽隱非用蜀漆和漿水涌吐之法無以發越陽氣更須龍骨固斂陰津於下雲母升舉陽氣於上斯陽從龍起陰隨涌泄庶胸次得以廓然蜀漆性專逐濕追痰稍增半分於本方之中則可以治太陰濕瘧濕爲陰邪糾紐其陽亦必多寒少熱故此方尤爲符合舊本金匱方後誤作溫瘧大謬詳雲母龍骨純陽之性決非溫瘧所宜以牝爲牡將濕作溫千古未剖之疑團一旦豁然貫通矣

牡蠣湯

牝瘧者多寒治之方

牡蠣

麻黃

各四兩

甘草

二兩

蜀漆

三兩無以恆山代之

右四味先洗蜀漆三過去腥

咬咀以水八升煮蜀漆麻黃得六升去沫乃內餘藥煮取二升飲一升卽吐出復飲之

〔衍義〕外臺牡蠣湯方下主治牡瘧多寒則牝牡不辨已不在千金方後也此方中牡蠣卽蜀漆散中龍骨之意蜀漆得雲母專升陽邪陷陰故以純陽之龍骨爲佐此方中麻黃卽蜀漆散中雲母之意蜀漆得麻黃專開陰邪之固閉故以純陰之牡蠣爲輔甘草調和藥性之陰陽也

有瘧瘧者陰氣孤絕陽氣獨發而脈微其候必少氣煩冤手足熱欲嘔但熱而不寒邪氣內藏於心外舍於分肉之間令人消燂脫肉也 有溫瘧者其脈平無寒時病六七日但見熱也其候骨節疼煩時嘔朝發暮解暮發朝解名溫瘧

〔衍義〕瘧之陰衰離於陽陽亦不并於陰故陽獨發而但熱肺受火抑故脈微少氣脾爲熱乘故手足熱胃因邪逆故欲嘔邪氣內藏於心故煩冤外舍分肉故肉燂條下雖未出方合用白虎無疑白虎專於退熱其

分肉四肢內屬脾胃非切於所舍者乎又瀉心肺之火非救其少氣煩寃者乎

白虎加桂湯治之方 石膏一斤知母三兩甘草二兩 粳米六合 右四味咀咀以水一斗二升煮米爛去

滓加桂心三兩煎取三升分三服覆令汗先寒發熱汗出者愈

〔衍義〕內經言溫瘧先熱後寒金匱言溫瘧但熱不寒雖有似乎瘧瘧而實不同也瘧瘧兩陽合邪上薰心肺所以少氣煩寃消爍肌肉溫瘧脈如平人邪未合而津未傷陽受病而陰不病所以骨節煩疼時嘔惟白虎以治陽邪加桂以通營衛則陰陽和血脈通得汗而愈矣

麻黃湯 治瘧須發汗方 麻黃 梔藁根 大黃各四兩 甘草一兩 右四味咀咀以水七升煮取二升半分

三服未發前食頃一服臨發一服服後皆厚覆取汗

〔衍義〕瘧宜發汗必壯熱脈實勢不得不用麻黃急開肌表以泄外淫之邪更審便溺燥結又不得不用大黃并疎裏氣以通內蘊之滯麻黃力猛甘草和之大黃性暴梔藁根濡之方得兼濟之妙服後厚覆取汗必非夏秋時瘧治例即當寒月苟非北方稟賦之強亦難效用方者不可不審反歸咎於立方之過也

治瘧或間日發者或夜發者方 恆山 竹葉各一兩 秫米一百粒 石膏二兩 右四味咀咀以水八升銅器中漬

藥露置星月下高淨處橫刀其上明日取藥於病人房中以銅器緩火煎取三升分三服清旦一服未發前

一食頃一服臨發一服三服訖靜室中臥莫共人語當一日勿洗手面及漱口勿進食取過時不發乃澡洗

進食并用藥汁塗五心胸前頭面藥滓置頭邊曾用神效

救急方用烏梅二七枚

〔衍義〕瘧之日發夜發或間日發由邪伏之淺深不同氣血所受非一此藥用恆山峻攻痰水或吐或下隨其攸利然在發散表邪後熱邪內盛而煩渴不止故借白虎竹葉石膏之法兼清肺胃之熱若中氣虛寒難於勝任者又未可以漫試也

又方 先作羊肉臛麵餅飽食之并進少酒隨所能令欣欣有酒氣入密室中煤炭火厚覆取大汗卽瘥○又方 燒黑牛尾頭毛作灰酒服方寸七日三

〔衍義〕羊肉補形形羸不勝藥攻故需酒肉醉飽密室火烘覆汗營衛得和卽瘥 諸毛之灰皆能收濕牛屬坤土取尾毛燒灰專除濕熱陳氣也

恆山丸 治瘧瘧說不可具方 恆山 知母 甘草 大黃 各十銖 麻黃 一兩 右五味爲末蜜和丸如梧子

大未食服五丸日二不知漸增以瘥爲度

肘後無大黃

〔衍義〕恆山截瘧首推善破胸中痰結得甘草則吐得大黃則利至於麻黃乃攻表之峻藥瘧久成痰有何客邪而復用之不知麻黃在丸劑中但爲隨班效力不能專逞其功況有知母斂其走表之性亦必從之內奪矣前麻黃湯中大黃則隨麻黃走表此恆山丸中麻黃則隨大黃走裏湯以急蕩丸以緩攻乃必然之理故瘧瘧得以用之苟不能透此一關未可與言千金之法

又方 治瘧經數年不瘥者兩劑瘥一月已來一劑瘥方 恆山三兩為末以雞子白和并手丸如梧子大置銅器中於湯中煮令熟殺腥氣則止以竹葉飲服二十丸欲吐但吐至發令得三服時早可斷食而晚不可斷食可竹葉汁煮糜少食之

〔衍義〕恆山治瘧有劫痰截病之功在胃氣虛人入口吐逆昏眩以故畏如戈戟卽強實人亦須雞子白和丸煮令去腥庶不大傷中氣服用竹葉飲專清胃中煩熱服時早可斷食隔晚不可斷食恐胃太空虛無力以行藥性也

梔子湯 治同前 梔子十四枚 秫米四十粒 恆山三兩 車前葉二七枚 右四味咬咀以水九升煮取三升分三

服未發一服發時一服發後一服以吐利四五行為度不止冷飲止之

〔衍義〕梔子湯中用秫米卽前方用雞子白之意用梔子車前卽前方竹葉之意

又方 恆山三兩 烏賊骨 升麻 鱉甲 附子各一兩 右五味咬咀絹袋盛以酒六升漬之小令近火轉之

一宿成一服一日合發可數服或吐下

〔衍義〕方中升麻鼓恆山以上涌烏鯁佐鱉甲以下泄附子和酒徹底以破濁陰涎垢也

治瘧方 鱉甲方寸灸 烏賊骨方寸 附子炮 甘草各一兩 恆山二兩 右五味咬咀以酒二升半漬之露一宿明日

塗五心手足過發時瘧斷若不斷可飲一合許瘥

〔衍義〕此方不用升麻而用甘草恆山得甘草則吐較升麻上升尤捷用塗五心前方亦無不可

治瘧無間新久者方 小便^半升 蜜^{二七} 右二味煮三沸頓服每發日平旦時服自至發勿食重者漸退不

過三服瘥○又方 車前子 鼠尾子^{各一虎口} 右二味以水五升煮取二升未發前服盡○又方 馬鞭草

汁五合酒三合分三服○又方 搗黃荬根燒為灰和水服一合量入大小強弱用之○又方 瓜蒂^{二七}

枚搗水漬一宿服之○又方 常以七月上寅日採麻花為家酒服方寸七

〔衍義〕小便寒降恐其滯邪煮沸則不速下和蜜湯以留中故瘧無新久咸可用之然必陰虛火旺者為宜

車前取其利水鼠尾取其散熱若表邪方盛未可槩施 馬鞭草功專入肝散血婦人經行前後尤為合

轍 黃荬子性稟陰毒燒灰猶能逐濕陰邪弱人不宜常試 瓜蒂吐胸中痰濕較之恆山力雖稍遜亦是

傷胃之品 麻花之性走而不守追逐遍體諸風惡血得酒以行其力而惡疾自除

蜀漆丸 治勞瘧并積勞寒熱發有時似瘧方 蜀漆 麥冬 知母 白薇 地骨皮 升麻^{各三} 甘草^{十銖}

鱉甲 烏梅肉 菱麩^{各一兩} 恆山^{一兩半} 石膏^{二兩} 豉^{一合} 右十三味為家蜜和丸如梧子大飲服十九日

再服之稍稍加至三三十九丸此神驗無不瘥也 一方加光明砂一兩

〔衍義〕此治積勞成瘧非虛勞之謂勞則火起於腎而積勞致困肝脾不能無預然火性上炎肺胃亦不能

無傷所以備用各經清潤之品惟升麻一味升散寒熱猶恐鼓動津液即以烏梅酸收配之瘧家多蓄痰涎

黃水非恆山不能上涌而此既用恆山復用蜀漆得無過猛之慮猶賴暗藏白虎等藥於中可以保安無艾

烏梅丸 治寒熱勞瘧形體羸瘦痰結胸中食飲減少或因行遠久經勞役患之積年不瘥方 烏梅肉 豆

鼓各一升麻 地骨皮 柴胡 前胡 鱉甲 恆山各一肉蓯蓉 元參 百合 蜀漆 人參 知母

桂心各半 桃仁八十 右十六味為末蜜丸空心煎細茶下三十丸二服老少孩童量力通用無所忌

〔衍義〕烏梅丸亦主勞瘧證雖新久攸分逐痰清熱則一方中柴胡前胡即前方白薇之意百合即前方葳

蕤麥門冬之意元參即前方石膏甘草之意瘧久脾腎兩虧非人參不能助長藥力非蓯蓉不除勞傷寒熱

寒熱積久肝血受傷則桂心桃仁又所必需耳

治勞瘧積時不斷眾治無效方 生長大牛膝一握切以水六升煮取二升分再服第一服取未發前食頃第

二服取臨發時

〔衍義〕勞瘧積年不除諸藥罔效乃邪氣痹著於下焦因取牛膝一味生切煮服不須復用他藥然瘧發午

前病屬陽分及風瘧暴發久瘧陽虛咸非所宜不可用熟熟則補而不宣無逐濕祛邪之用也

大五補湯 治時行後變成瘧瘧方 人參 白朮 茯苓 甘草 黃芪 乾地黃 當歸 芍藥各三 芎

藟 遠志 桔梗各二 桂心三十 竹葉 五兩大棗二十 生枸杞根 生薑各一 半夏 麥冬各一 右十八

味咬咀以水三斗煮竹葉枸杞取二斗次內諸藥煎取六升分六服一日一夜令盡

〔衍義〕方下所主時行後變成瘡瘡瘡則山嵐瘴氣非由變成詳方中諸藥一皆調補之味又非治瘡之品此必瘡字誤刊瘡字亥豕相似之故耳

鯪鯪湯

治乍寒乍熱乍有乍無山瘡瘡方

鯪鯪甲

十四枚

鱉甲

各一枚

烏鯪骨

各一枚

恆山

三兩

附子

一枚

味咬咀以酒二升漬一夕發前稍稍啜飲勿絕吐之兼以塗身斷食過時乃食飲

〔衍義〕時行瘡癘之氣不犯陽明濕土而傷風木之經所以寒熱不時非若尋常瘡發之有常期也瘡邪既

犯厥陰故取專走肝經血肉之味兼附子通行經脈之力鼓舞恆山迅掃痰涎一涌而渙散無餘瘡瘡之金

錐無愈於斯也

烏梅丸

治肝邪熱為瘧令人顏色蒼蒼氣息喘悶戰掉狀如死者或久熱勞微動如瘧積年不瘥方 烏梅

肉

蜀漆

鱉甲

葳蕤

知母

苦參

各一兩

恆山

半兩

石膏

香豉

一合

甘草

細辛各十銖

為末蜜丸如梧子大酒服十丸日再飲服亦得

治心熱為瘧不止或止後熱不歇乍來乍去令人煩心甚欲飲清水反寒多不甚熱者方 甘草 一兩 蜀漆 三

兩恆山

鱉甲

各四兩

石膏

香豉

一合

梔子

烏梅

各三枚

淡竹葉

切二升

右九味咬咀以水九升煮取三升

分三服

恆山丸

治脾熱為瘧或渴或不渴熱氣內傷不泄令人病寒腹中痛腸中鳴汗出 恆山 三兩 甘草 半兩

知母 鱉甲各一兩 右四味爲末蜜丸如梧子大未發前酒服十丸臨發時一服正發時一服

恆山湯 治肺熱痰聚胸中來去不定轉而爲瘧其狀令人心寒甚則發熱熱間則善驚如有所見者方 恆

山三兩甘草半兩秫米三百二十粒 右三味咬咀以水七升煮取三升分三服至發時令三服盡○又方 治

腎熱發爲瘧令人淒淒然腰脊痛宛轉大便難目眴眴然身掉不定手足寒方 恆山三兩烏梅三七枚 竹葉

切一升香豉八合葱白一握 右五味咬咀以水九升煮取三升分三服至發令盡

〔衍義〕五臟之瘧皆在於經而諸經見證雖各不同其主治之用總以恆山謂漆爲破的之金錒其熱在於

肝令人顏色蒼蒼又須烏梅鱉甲爲引以收耗散之陰 熱在於心令人煩心欲飲清水又須竹葉梔子爲

引以清發渴之熱 熱在於脾令人腹痛腸鳴又須甘草爲引以滋燥竭之土 熱在於肺令痰聚胸中去

來不定又須秫米爲引以護傷殘之氣 熱在於腎令人淒淒然腰脊痛目眴眴然又須葱白香豉以發內

陷之邪

藜蘆丸 五臟並有瘧候六腑則無獨胃腑有之胃腑瘧者令人巨病也善飢而不能食食而支滿腹大治之

方 藜蘆 恆山 皂莢 牛膝各一兩 巴豆三枚 右五味先熬藜蘆皂莢色黃合搗爲末蜜和丸如小豆

大目服一丸正發時一丸一日勿飽食肘後無恆山牛膝

〔衍義〕六腑之瘧多見經證純屬於腑者惟胃腑有之故證見善飢不欲食腹支滿則爲胃腑受病之候又

須臾蒸佐藜蘆以上涌牛膝引巴豆以下奪腑實之病與經熱不同非極力峻攻不能豁然取效

刺灸法

肝瘡 厥陰見血 心瘡 刺手少陰 脾瘡 刺足太陰 肺瘡 刺手太陰陽明 腎瘡 刺足少陰太陽 胃瘡 刺足太陰陽明橫脈出血 凡灸瘡必先問其病之所發者先灸之從頭項發者於未發前預灸大椎尖頭漸灸過時止從腰脊發者灸腎腧百壯從手臂發者灸三間 瘡灸上星及大椎至發時令滿百壯灸艾炷如黍米粒俗人不解取穴務大炷也 覺小異卽灸百會七壯若後更發又七壯極難愈者不過三灸以足踏地以線圍足一匝中折從大椎向百會灸線頭三七壯炷如小豆壯 又灸風池二穴三壯 凡一切瘡無問遠近正仰臥以線量兩乳間中屈從乳向下灸度頭隨年壯男左女右 五臟一切諸瘡灸尺澤七壯穴在肘中約上動脈是也 諸瘡而脈不見者刺十指間出血去必已先視身之赤如小豆者盡取之 瘡刺足少陰血出愈 瘡瘡上星主之穴在鼻中央直髮際一寸陷容豆是也灸七壯先取譙諒後取天牖風池 瘡日西而發者臨泣主之穴在目眦上入髮際五分陷者灸七壯 瘡實則腰背痛虛則軌衄飛揚主之穴在外踝上七寸灸七壯 瘡多汗腰痛不能俯仰目如脫項如拔崑崙主之穴在足外踝後跟骨上陷中灸三壯 瘡瘡法 未發前抱大雄雞一頭著懷中時時驚動令雞作聲立瘡

治瘡符 瘡小兒父字石拔母字石鑿某甲 著患人姓名 患瘡人竊讀之曰一切天地山水城隍日月五星皆敬竈

君今有一瘧鬼小兒罵竈君作黑面奴若當不信看文書急急如律令 右件符必須真書前後各留白紙一行擬著竈君額上瓦石壓之不得壓字上勿令人近符若得專遣一人看符大好亦勿令灰土傳符上致使字不分明出見著符次第如後若明日日出後發須令人夜掃竈君前及額上令淨至發日旦令患人整衣帽立竈前讀符使人自讀必須分明讀符勿錯一字每一遍若別人讀一遍患人跪一拜又以手捉患人一度若患人自讀自捉衣振云人姓某甲如此是凡三遍讀三拜了淨瓦以石壓兩角字向上著竈額上勿令壓字上若瘧日西發具如上法三遍讀符至午時更三遍讀如上法如夜發日暮更三遍讀並如上法其竈作食亦得勿使動此符若有兩竈大竈上著符若有露地竈屋裏竈上著止有露竈依法著之仍須手捉符其符法如後若有客患會須客經停過三度發三度委曲著符如上法符亦云客姓名患瘧乞拘錄瘧鬼小兒如左凡治久患者一著符一漸瘥亦可五度著符如始可全瘥又須手把符如左

王良符張季伯書之急急如律令 右王良符依法長捲兩手握念佛端坐如須行動檢校插著胸前字頭向上 右二符各依法一時用不得闕一符萬一不瘥但得一發輕後發日更讀卽瘥一一仔細依法若字參差卽不瘥

診谿毒證第十六

江東江南諸溪源間有蟲名短狐溪毒亦名射工其蟲無目而利耳能聽在山源溪水中聞人聲便以口中毒

射人故謂射工也其蟲小毒輕者及相逐者射著人影者皆不卽作瘡先病寒熱身不喜冷體強筋急頭痛目
疼張口欠咳嗽呼吸悶亂朝旦少蘇醒晡夕輒復寒熱或似傷寒發石散動亦如中尸便不能語病候如此自
非其土地人不常數行山水中不知其證便謂是傷寒發石散動作治乖僻毒盛發瘡復疑是癩疽乃至吐下
去血復恐疑蠱毒是以致禍耳今說其狀類以明其證與傷寒別也方見二十五卷備急篇中

孫真人備急千金要方衍義卷中終